

湯文正公史稿



潛菴先生擬明史稿卷十三

睢州湯斌

斌潛菴擬

同里田蘭芳箕山評

羅通字學古吉水人曾祖仲淵國初以富民徙實

京師永樂中上書言事成祖嘉之仁宗監國時嘗  
詣東宮白江甯上元兩縣令寃仁宗稱爲長者通  
弱冠舉永樂十年進士授監察御史巡按四川蜀  
藩出入僭用乘輿儀從通悉收之始蜀中士大夫  
見通年少稍易之至是皆驚服通一用璽書以威

潛菴先生史稿

列傳十七  
卷十三

一

嚴爲治還朝借諸御史請罷巡邊忤旨未發會交  
趾平地絕遠多瘴癘而夷獠新附不樂受約束中  
朝士憚往乃詔御史予三級知交趾諸州而通得  
清化無何黎利復叛而成山侯王通兵敗擅與利  
媾檄割七城與利清化亦在割中通怒曰王通不  
受上命喪師辱國此誠通生死所耳于是獨不與  
利清化利大發兵八萬人來攻通出奇大敗之賊  
不敢復嚮清化踰年詔使至如成山侯語乃率吏  
士歸交趾事大壞帝怒收成山侯論死贖爲庶人  
餘罷斥殆盡而獨引勞通改戶部員外郎遷兵部

郎中正統三年從尚書王驥北征坐事下獄久之  
謫容山閘官調東莞河泊所景帝卽位邊事棘廷  
臣有以通名薦者召復爲兵部員外郎守居庸關  
通上言臣竊見鄧艾取蜀蜀守成都備艾艾從劍  
關緣崖而入蜀破而守成都者猶不知劉裕取秦  
秦守潼關備裕王鎮惡乘舟遡渭至咸陽秦破而  
潼關守者猶不知居庸固京師後門相去百里一  
失守則敵入京師在旦夕耳臣遍閱諸阨塞有口  
可通入馬者七十所可通人不通馬者一百三十  
所須多方設備京師乃固又乞命大臣總督軍務  
潛菴先生史稿列傳十七  
卷十三

二

帝卽擢通副都御史便宜行事已而也先擁衆人  
塞破紫荆關直犯都城尚書于謙等營德勝門力  
戰却之尋復逼居庸甚急會天大寒通令老弱汲  
水灌城城冰堅滑不得近七日乃走通追擊大破  
之捷聞賜璽書褒獎召入參贊軍務理院事通計  
宣大諸路關口墻柵爲敵殘破請勅石亨自紫荆  
出大同楊洪自居庸出宣府沿途統督官軍堵塞  
修理因言邊軍妄報首功虛張敵勢都城之戰斬  
獲幾何而冒濫陞賞又言拖玉珥貂者皆全軀保  
位之臣曾無報國奉公之志與謙等忤未幾也先

復寇宣府謙因言宜選謀畧大臣往鎮山西楊洪亦乞遣文職重臣率兵出鴈門用鹿角擡營護山西餽運廷臣推通往通意不樂請與謙洪同行帝仍以命通通提兵至懷來逐寇出長安嶺外師還協贊京營軍務四年進左都御史旋加太子少保景帝不豫石亨張軌謀復上皇密語通通曰竊觀天象事必濟予老矣不能從諸公好爲之尋遭喪歸天順三年起復右都御史未幾致仕年八十餘臨終諸子進藥通曰羅通生死豈在草木哉成化中隆慶州父老詣闕頌通功勅祠居庸關邊人以潛菴先生史稿

列傳十七卷十三

三

通爲神水旱疾疫必禱焉

羅亨信字用實東莞人永樂二年進士授工科給事中坐事貶交趾洪熙初起爲監察御史巡按畿內有聲超擢都察院右僉都御史正統二年阿台朶兒只伯擾邊叅贊陝西軍務同都督蔣貴等率師搜捕貴等駐師魚海逗畱不進亨信至其營讓之曰公等受國恩甚厚握重兵臨敵退縮安用公等且公等特畏死耳死國法孰與死敵貴等色變佯應曰諾然終無進兵意亨信乃上疏曰臣等奉命出師以陛下神靈士卒用命芻蕘盈積車甲充

滿一鼓而進賊必成擒都督臣貴等遂巡不發老  
師玩寇遂無成功今水凍草枯宜且休師多遣間  
諜探賊所在請俟來春專命重臣量調精兵約會  
寧夏軍馬仍從魚海分道進擊庶賊首可得邊境  
可寧帝以章示尙書王驥併下貴等貴等感奮明  
年戰于石城大捷東西夾擊千有餘里斬獲無筭  
阿台朶兒只伯以數騎遁論功進亨信祿一等賚  
白金文綺死是遭父喪請歸帝令奪情視事至是  
始命歸葬賜楮幣千緡令事竣還朝巡撫宣府大  
同總督屯田十年進右副都御史前後奏汰冗官  
潛菴先生史稿

列傳十七  
卷十三

四

省虛費積邊儲禁私役皆報可又言臣觀瓦刺情  
狀惟俟釁端欲爲邊患請修各衛城堡以防深入  
宣府距懷來二百餘里空濶無援請于淨水坪立  
馬營移保安衛美谷所于沙城西互相聯絡而於  
險阨峪日各立關隘於計爲便時議難之石亨請  
科大同四州七縣民三丁之二爲兵亨信奏止之  
又有詔令宣府諸衛軍餘田地量畝起科亨信言  
塞北諸軍防邊勞苦其餘丁無他生業惟事田作  
冬春迎送瓦刺使臣秋月修治關梁斥堠不遑休  
息一歲在田不過數月耳邊地磽瘠霜早收薄若

徵其稅則人不復耕必逃竄他所軍心攜貳誰與  
共守帝嘉納之十四年轉左副都御史會土木變  
作廷議徵宣府兵入衛官吏各率其民棄城走亨  
信仗劍坐城門下令曰敢出城者手斬之又進諸  
將而誓之曰朝廷付亨信以此城亨信以死守之  
而已願諸君無懷他志城中老稚聞亨信言乃稍  
定也先奉車駕至城南傳諭開門亨信立城上語  
曰吾奉天子命守此城不敢擅啟閉也先引去當  
是時天子見其時之難爲則功爲甚偉旣北寇日薄城下關門左右皆爲戰場  
積骸徧山谷而朝議紛紜未定握兵之將愕眙賊

潛菴先生史稿

列傳十七  
卷十三

五

踏亨信以孤城當其衝外禦強寇內屏京師卒能  
全城還報天子景泰元年以年踰七十乞致仕不  
許是秋入京陛見辭益力免冠叩首上見其着兜  
鍪處顛髮皆盡乃許焉歸八年卒年八十有一諡  
馬昂字景高滄州人貌魁梧鄉舉授序班正統初  
擢監察御史整飭大同兵備刑部失囚尚書以下  
俱獲罪超擢刑部右侍郎改副都御史參贊甘肅  
軍務劾都督王喜玩寇罪喜坐謫戍赤斤蒙古罕  
東諸番屢掠入貢駝馬昂率兵邀擊之擒其酋景  
泰初以疾乞休帝不悅命致仕未幾兩廣總督王

翺入爲尚書起昂總督軍務兼巡撫兩廣昂至擒賊渠周鐵等獻俘京師進右都御史又平斗峒賊改左都御史未幾復乞致仕入見畱巡山西諸邊還掌院事天順初進兵部尚書帝素偉其貌又以李賢薦甚眷之石亨敗其黨昌奪門軍功者盡削職又悉調老弱軍官于外而行之有次第不驚擾昂力居多五年陝西邊警總督與懷甯侯孫鏗西征師且出會曹欽反夜戰于東華門外竟斬欽以功加太子少保世錦衣衛百戶仍掌部事自是寵遇日加珍奇文錦之賜勲威莫敢望焉成化初調

潛菴先生史稿

列傳十七  
卷十三

六

戶部尚書與都御史林聰等點閱京兵檢精銳爲十二營更番教練又定將領黜陟之制議皆自昂發之未幾以星變致仕昂屢任邊陲曉暢兵事英宗委任昂與吏部王翱埒每召見詢將官短長用邊鎮巡撫必令李賢王翱與昂議故一時邊鎮督撫多得其人及爲戶部亦欲理財裕國顧會計非其所長功名損于兵部時卒年七十八贈少保謚恭襄錄子忠國子生恕錦衣世百戶

寇深字文淵真定唐縣人幼機警永樂中以諸生上書告鄉人謀變得召爲國子生時有言山東錢

穀多積弊遣中官陳保往察之求國子生敏練者  
得深與俱深會計精詳保甚喜還朝聞之於帝授  
刑部主事遷員外郎盡心刑獄大臣亦稱其才正  
統初以薦遷山西按察司副使錄囚諸郡奏釋五  
十餘人十一年四川松潘不靖守臣請選才勇武  
臣出師勦之帝方以撫循爲意雅不欲用武臣乃  
召深同鴻臚寺署丞祁全往撫諭未幾擢右僉都  
御史提督松潘兵備至則奏請諸將徐貴郭禮孫  
敬畫地分守而悉聽鎮守都指揮僉事王杲調遣  
經畧稍定卽率兵破賊砦擒其渠魁械送京師諸  
潛菴先生史稿

列傳十七  
卷十三

七

番讐服乃相其要害建關堡城池六十餘所哨臺  
三百七十餘座平治險阻開通餉道邊境晏然以  
功進左副都御史有綵幣白金之賜尋改提督遼  
東軍務深爲人剛果遇事敢任在蜀旣樹威名及  
往遼官屬皆畏憚而深顧稍尚寬和衆加悅服妖  
賊李福惠聚衆鼓亂深遣都指揮周英捕獲之景  
泰五年有邊寇深分遣將士追勦頗有斬獲威名  
益振深在邊歲久以母老累上章乞歸不許七年  
還京議事時母年九十餘矣深急請歸省至家母  
已病篤服闋進左都御史當是時邊疆多故帝以



深歷練既久雅重之嘗召訪政務呼老寇而不名  
然深無學術晚年益嚴刻忤急睚眦必報百僚震  
懾初善事曹欽父子已而漸疎欽頗恨及深掌憲  
職而十三道御史連章劾欽欽益恨之次骨未幾  
欽反執深深不屈遂遇害年六十九贈少保謚莊  
愍

王來字原之慈谿人偉姿貌倜儻不羣少隨父居  
金谿里中有叢祠俗云善爲人禍福羣惑焉來谷  
劈其象燬之撤其祠父桓洪武中爲盧氏知縣以  
老歸嘗爲武弁誣構下於理來甫弱冠卽上書白

潛菴先生史稿

列傳十七  
卷十三

八

父寃宣德二年舉會試乙榜授新建縣教諭先是  
王府時祭多以生員充樂舞生來請以道士易之  
著爲令以薦擢監察御史巡按蘇州勅借巡撫侍  
耶周忱考察官吏中有請自上裁語來曰貪官污  
吏當去卽去之遲留何爲請易勅奏上從之中官  
陳武假挾太皇太后懿旨橫江南來適其與詔不  
合者將劾之武懼爲稍沮還懇於帝翼日朝罷帝  
問都御史顧佐蘇州巡按爲誰佐以來對帝曰識  
之後毋失此人也正統初少師楊士奇薦爲山西  
左叅政廉明練達事至立決巡撫侍郎于謙亟稱

之將舉以自代然剛銳太過時傷嚴察爲當道所不容遂調廣東左叅政十四年遷河南左布政使有言周王將謀不利者朝議討之來力陳不可自請王宮歷歷陳禍福王悔悟闔宮痛哭急讓還護衛卒以自贖事乃解河水溢且齧汴城來築堤捍之城以無虞景泰初擢都察院左副都御史巡撫河南湖廣尋進都御史兼大理寺卿苗民亂黔楚間官兵連歲撲勦不得滅命來往總督之來馳至湖廣沅州分兵九萬八千爲五哨進逼靖州連戰大破之斬首三千餘級賊走匿香爐寨寨懸萬山大破之斬首三千餘級賊走匿香爐寨寨懸萬山

潛菴先生史稿

列傳十七卷十三

九

中陡絕不可上來審嚮導樹木柵架飛樓以爲鎗火箭晝交夾擊發巨夜裂其崖石拔寨生擒賊首韋同烈并賊將五十八人餘悉撫定遂於貴州清平道上刻石紀功曰平蠻恩信碑師還帝召見便殿慰勞之遷南京工部尚書兼大理寺卿天順初致仕成化六年卒於家

林聰葉盛朱鑑李侃沈固程信列傳

林聰字季聰寧德人正統四年進士授刑科給事中景帝卽位劾光祿卿李亨附王振得卿寺亨坐罷去又劾總兵官孫鏗楊洪石亨不協降勅諭之景泰元年遷吏科都給事中劾駙馬都尉石璟橫奪民田璟坐免官時司禮監金英家奴李慶殺人法司莫敢問聰劾英怙寵并論都御史陳鑑王支御史宋瑛謝琚等畏勢長奸又內侍單增驕縱大臣有餽贈如王振時者聰復率六科十三道盡暴其惡皆下錦衣逮治久之宥鑑文而罷瑛等聰直

潛菴先生史稿

列傳十八  
卷十二

十

聲震朝廷二年上皇將還議迎復禮千戶龔遂榮投匿名書于高穀家穀以示廷臣王直曰此所謂禮失求諸野耳胡濙欲上聞王文止之聰上言直濙皆股肱大臣不當私語齟齬大政詔按之遂榮恐累穀自首曰迎上皇禮本當厚遂榮投此帖冀感動無他腸甘死無悔乃下廷議或言也先遣使言和不可信卽迎駕一車二馬足矣聰言上皇北狩與陛下迎鑾皆社稷綱常大計宜從厚無貽他日悔三年議易儲聰與御史朱英言不可然未敢

爭尋命廷臣俱兼宮僚聰改右司直郎商輅曰言

官不可無聰復爲吏科都給事中四年也先遣使來貢自稱大元田盛大可汗朝廷欲賜勅書而難其稱下廷臣議聰言也先弒逆而遣使入貢將覘朝廷有人否耳今從其所自稱則長賊志而示中國弱若仍其故號又恐激其怒爲邊境患請待以常禮賜勅來使令歸語以君臣上下之分順逆吉凶之道庶國體不失亦可示疆於外乃大臣議至欲稱爲瓦剌可汗意謂不從彼稱必召邊釁借使稱之彼復他求又將若何臣愚以爲不稱可汗他日入寇尚可明正其罪恭行天罰一稱可汗則陛

潛菴先生史稿

列傳十八卷十三

十一

下旣已與之矣後將何以正其罪乎時安遠侯柳

溥郎中章綸亦以爲言帝卒從諸大臣議稱可汗

蓋惜之

答之戶部侍郎張睿國子祭酒劉鉉並母喪奪情

聰抗言侍郎六卿之亞祭酒師儒之宗忠孝大節

所關請令遵制終喪大臣身係安危不得已奪情

起復亦一時權宜非經世之大典若一槩奪情遂

成故事子道旣虧臣節難保時無金革請循舊章

時論偉之五年因災異率六科給事中條上修德

弭災事宜累數千言其大要以絕玩好謹嗜慾戒

逸樂公黜陟爲崇德之本雜引五行諸書謂積雪

窮陰震雷不時皆陰盛陽微小人進君子退之象  
且言陛下之臣得無有君子尚在疎遠而小人幸  
蒙親任者歟得無有驚桀專恣竊祿苟容者歟木  
冰兵象也山東河南徐邳淮泗之間水旱相仍貧  
窮無告而外敵強橫所當思患而預防之又曰齋  
醮供僧之費雖曰給自內帑其實出於民間借曰  
祈福禳災而天災蚤見民艱自若何補國家之分  
寸又曰武清侯石亨都督王竑等奏討牧田動至  
二三百頃加以狡獪之徒倚勢橫侵怨歸朝廷何  
可不禁語皆剴切中時弊帝嘉納焉當是時諫臣

潛菴先生史稿

列傳十八  
卷十三

十一

惟聰與葉盛最著然亦用是爲人所忌又嘗劾吏  
部尚書何文淵刑部尚書俞士悅工部侍郎張敏  
通政使李錫雖或畱或罷而大臣忌之愈甚都御  
史王文入內閣因諷御史黃溥等劾聰數挾制吏  
部紊亂選法因撫拾數事以聞詔集廷臣會鞠坐  
大臣專擅選法論死禮部尚書胡濙不署名曰大  
臣以私怨殺諫官不可拂衣出議亦旋罷濙歸稱  
病數日不朝帝遣太監典安問之對曰老臣本無  
病聞欲殺林聰殊驚悸耳帝聞卽釋聰左遷國子

監學正英宗復位超擢右僉都御史賑饑山東還

進右副都御史捕江淮盜賊以便宜擒渠魁數人  
餘無所問丁內艱起復固辭不許命掌院事天順  
五年曹欽反昌功者至割乞兒頭上功都人不取  
夜出聽力言其害欽妻父賀老以素與欽絕請宥  
之先是都御史力能制十三道御史使不言聰掌  
臺諸御史爭言事大臣多厭之或以咎聰聰曰已  
不能言而復道人使不言非聰所能也成化二年  
江淮旱人相食命聰往撫奏請發倉及留漕粟數  
十萬石賑之九載滿進右都御史七年出撫大同  
八年致仕十年起掌南京都察院事十三年召入  
潛菴先生史稿

列傳十八  
卷十三

十三

爲刑部尚書加太子少保與定西侯蔣瓌按事遼  
東馬文升坐謫戊明年乞致仕不許十八年卒于  
官贈少保謚莊敏聰恂恂和易遇事剛決知無不  
言晚更爲謙厚與物無忤或疑稍涉浮沉遼東之  
行與汪直共事不無附會聲望因之少損云  
葉盛字與中崑山人正統十年進士授兵科給事  
中英宗北狩郕王監國盛率同列請先誅將士扈  
從失律者然後選將練兵爲復讐計也先迫都城  
一日三上疏言兵事聞者壯之寇退復言也先以  
送駕爲名志在索賂緩戰守之具誤將士之謀不

可不察也昔金兵南下宋人狙於和議遂成靖康之禍可爲炯鑒又言宜明賞罰以示勸懲勇戰如孫鏗死事如謝澤韓清此當賞也其守禦不嚴赴難不力者當罰也遷都給事中時有議留邊帥守京師者盛言今日之事邊關爲急往者獨石馬營不棄則六師何以陷土木紫荆白羊不破則塞馬何以薄都城卽此而觀則知邊關不固縱守京師不過保九門而已如陵寢郊壇何如圻甸生靈何臣謂宜固守宣府居庸便會河南陳州流民聚爲亂勅盛往視除貪虐賑饑寒民稍解散歸而上言

潛菴先生史稿

列傳十八  
卷十三

古

者屯田以給軍食在鎮五年邊用以饒遭父喪去  
英宗素知其名天順二年起復爲僉都御史巡撫  
兩廣與都督顏彪破賊砦七百餘所斬首萬級方  
請立軍府梧州居中調度爲破峽計或有以殺降  
謗者遂召盛還代以韓雍丘濬素與盛不相能上  
書內閣李賢頗實其事又有譖言賢信之故勅雍  
曰無若葉盛之殺降也盛置不辨遂還成化初代  
李秉巡撫宣府復舉官牛車屯之法修築屯堡七  
百餘所墾田四千頃邊用復饒寇希入塞三年上

疏言臣見故永寧伯譚廣居宣府二十餘年至今

潛菴先生史稿

列傳十八  
卷十三

五

兒童婦女皆知其名臣誠感嘆以廣之功名爵位  
及身而止請加贈謚錄及後人以爲邊臣之勸臣  
因推舉耳目覩記如廣類者若鎮守廣西都督山  
雲浙江都督許亨寧夏都督張泰等皆有賢聲臣  
又因而推舉文職大臣如廣類者則純誠朴忠如  
王直胡濙高穀清德正學如儀智薛瑄陳璉吳溥  
楊翥吳訥風節凝峻如錢習禮李時勉廉恭體國  
如師達古朴顧佐王賢魯穆李棠楊信民軒輓王  
宇公勤才望如金忠張本魏源張駿羅汝敬劉中  
敷鄺埜王佐王香侯璉徐琦王士嘉李嘉段民焦



宏金問薩琦王恂張鳳沈翼年富賈銓太學模範  
如胡儼陳敬宗他如魏驥陳泰李敏馬謹亦有可  
稱又有沒於王事如鄧葵等者國家有道之長百  
年於茲仁賢輩出中外皆有其人臣寡陋不能悉  
知乞特命儒臣繙閱記載大集在廷博求公議其  
行能尤著者並加恩典昔漢晉於蕭何羊祜則恩  
及其妻唐太宗於屈突通張道源則錄及其子陛  
下誠採臣議舉行漢唐令典百官有位風勵實多  
帝稱善於是廣得贈侯賜謚而顧佐軒輓馬謹王  
士嘉沈翼之後皆得收錄當時益以盛爲賢頃之

潛菴先生史稿

列傳十八  
卷十三

六

遷禮部右侍郎明年改吏部李賢卒勅尚書王翱  
簡可入內閣者翱舉柯潛等五人盛名在第四帝  
不果用時鹵久居河套廷議以十萬衆大舉逐之  
沿河築城抵東勝徙民耕守帝壯其議勅盛往與  
督撫詳議以聞初盛爲諫官喜論兵事歷南北邊  
常多建白旣往來三邊知時無良將邊備久虛轉  
運復艱搜河套復東勝未可輕議乃上疏以守爲  
長策戰乃權宜如必決計用戰亦宜堅壁清野伺  
其剽掠而歸氣盈心惰則設伏以邀其前縱騎以  
襲其後令彼一遭挫衄庶可遏其再來又或乘其

人掠分遣精卒進搆老營彼將反顧內外夾擊庶  
多鹵獲然必守固而後戰可議也帝善其言然廷  
臣猶主復套之說盛旣歸遂命趙輔出師用衆八  
萬費鉅萬計兩年迄無功而還人以是服盛之先  
見焉尋轉左侍郎卒謚文莊初盛爲給事中與林  
聰並以敢言名後聰以勘遼東馬文升事爲時論  
所譏尹旻與張寧論六科人物寧獨稱聰旻曰季  
聰何敢望與中也其爲當時所重如此

練達通方復能持以老識明臣之不數見者  
點晴處能使其隱悉見

潛菴先生史稿

列傳十八  
卷十三

七

朱鑑字用明晉江人舉鄉試授蒲圻教諭宣德初  
擢監察御史巡按湖廣時梅花峒賊蕭啟寧等久  
勦無功鑑諭降之請復舊制命副使僉事按行所  
屬問民疾苦湖湘俗重貨殖男女過三十尚無室  
家鑑申明洪武禮法其俗遂變事滿當代都御史  
顧佐等奏留久之正統初復按廣東馳諭欽州叛  
民黃金廣等散其衆明年代還帝命勲衛官習兵  
法臣鑑諸書擇御史董之臺議推鑑乃奏設武學  
著爲令七年轉山西左叅政進右布政使景帝監  
國就擢右副都御史巡撫其地鑑上言聖駕北轅

古今異變夫千金之子坐不垂堂是何奸邪竊弄  
遂使至此夫既往難追將來宜謹今也先奸詐百  
端剽掠殺戮動數十萬復假托和親往來遣使一  
則覘我虛實一則通我降人蓋以送駕爲由則必  
開關延接稍示抗拒彼卽有辭請選將練兵重其  
事權監軍中貴悉行停罷重整散漫之兵廣募智  
勇之士罄奸邪之積發太倉之陳重懸賞格用勸  
膚功再徵勤王之兵合力復讐大駕可還敵兵自  
退如也先欲送駕結好實固未爲可喜虛則愈宜  
加防務令單騎斂甲仍勅驍將謹備雖暫苟安還

潛菴先生史稿

列傳十八  
卷十三

六

當振旅竊見王振濁亂天下震驚神器江南寇發  
皆以誅振爲名夫事歸朝廷則治歸宦官則亂自  
秦漢唐宋以來喪位失國未有不由此者昔太祖  
高皇帝與群臣議事必屏去左右恐泄事機伏望  
念祖宗開創之勞將相經營之苦選智勇托忠義  
開直諫之路杜權倖之門凡軍國重事委任大臣  
必當有濟苟或仍用內侍竊持國柄外寇不至內  
讐必生欲以雪耻復讐臣未見其可太后讀其疏  
至泣下景帝卽位首劾通事指揮李讓潛通瓦剌

罪請增置通薊諸巡撫帝悉從之景泰元年移鎮

鴈門上皇還國帝勅邊將掩擊也先鑑上言臣聞  
帝王不計小忿以安民也先慕義請和送還上皇  
彼以誠來我宜以誠報且其歸去邊未遠我既失  
信彼且無狀臣愚未見其可帝嘉納焉因命兼巡  
撫山西會遣大臣案行天下禮部侍郎鄒幹至山  
西多所論劾鑑言自幹至民間刁許日甚請召幹  
還幹因論鑑狗護帝是幹言召鑑還佐院事未幾  
乞致仕歸初景帝易儲鑑貽大學士陳循書言其  
不可且曰陛下於上皇當避位以全大義奈何反  
爲幽閉循省覽驚悸不敢言士論壯之成化十四

潛菴先生史稿

列傳十八  
卷十三

九

年卒先是寇逼鴈門鑑遣兵禦之麾下壯士陳福  
躍入陣逐北數十里明年戰代州賊圍之數重矢  
下如雨福殊死戰賊爲斂却遂潰圍出福慷慨誓  
滅賊病不解甲擊賊歸血汗沾背力竭病渴數日  
死福莆田人年三十六

李侃字希正東安人正統七年進士授戶科給事  
中進都給事中也先犯京師議者欲燔城外積芻  
無爲寇資侃言臣竊計寇輕剽無持久心請勿燔  
便景帝爲遣都御史陳鑑禁止之嘗面糾戶部尚  
書金濂違例徵歛罪詔宥之侃跪伏帝前不肯起

言瀛罪大不可赦卒下瀛獄時有易儲之議百官皆署名侃與都給事中林聰御史朱英持不可久之度不可爭乃署執筆而慟及選宮僚以侃有聲望擢詹事府丞時史館欲倣朱熹例修宋元綱目奏選文學之臣充纂修官侃與焉書未成而英宗復位改太常寺丞丁父憂服闋補太僕丞進少卿未幾擢右僉都御史巡撫山西兼提督鴈門首劾巡按御史李傑不職傑坐除名貪墨者望風欽避時邊方無事侃志在安輯飭守備廣儲積以振風俗正人心爲務乃至令吏胥被儒巾服時雍雍趨潛菴先生史稿列傳十八卷十三

三

走以爲可變化其心論者頗以爲迂尋以母憂去軍民擁留至不得行服除固請致仕成化二十一年卒侃于官纔四品例不得賜卹帝念其賢特賜祭葬侃性篤孝北兵犯京師二親在容城請告冒白刃迎之晚年家居貧甚死之日幾無以爲斂子二德恢德仁俱進士歷官有聲

沈固字仲威丹陽人幼受書鄉塾日記萬言太祖御製大誥三篇成令有司舉秀民能讀者固方九歲與選召至京試誦終篇無遺謬賜鈔還既弱冠舉京闈鄉試授沂州同知諸老吏皆畏憚之州西

寶山社故產銀鑛或言于朝請置局採辦下有司  
勘實固執奏謂利少而費多恐擾民生變成祖是  
其言事遂寢徵入爲戶部員外郎遷郎中出爲山  
東右叅政督餉北邊還會仁宗立命以本官同武  
安侯鄭亨督軍鎮大同賜璽書以行宣德間數建  
白邊事有言大同民私隱田稅者遣侍郎柴車等  
按之固言邊地薄而賦重人所不堪且戎事方殷  
宜從寬大帝嘉其識體正統初特詔褒美賜白金  
文綺因上言西北三邊脫歡等數入爲寇彼未經  
大創故也計諸關隘延袤千里寇所從入不可勝

潛菴先生史稿

列傳十八  
卷十三

三

備間與之值薄有斬獲而近奉詔旨不許窮追以  
是往往得志去有輕我心臣謂不探虎穴安得虎  
子請勅緣邊諸將臨戰見可而進勿憚追奔平居  
則多置間諜覘賊牙帳所在乘隙突出搗其巢窟  
或數以輕騎撓之彼將奔命不暇何寇之能爲未  
幾固與征西前將軍方政游擊將軍楊洪等率師  
護朝貢使臣出境因絕漠度赤山耀兵破陣而還  
尋命綜理兵食特鑄總督邊儲印使佩之乃復陳  
邊計謂兵之所需惟餉爲急將欲安邊當務久計

臣嘗歷事大同頗知地理其中路有青楊林馬頭

山西則有樺皮溝行院屯稍遙而東則爛柴溝陽和灘諸處皆沃土美水草先朝屯種所也自邊患日深鎮臣遷民入保爲免禍計其地遂爲廢壤臣謂古今備邊長策莫如屯田此趙充國之所以困先零也宜分遣諸屯步卒就近墾治而以春秋陳兵護其耕穫足國贍軍無便于此又言大同爲雲朔巖疆密邇巨敵每遇征討諸將奉勅盡行倘敵以偏師綴我而潛軍趨鎮何以禦之自後出戰居守當分任其責庶可萬全無害時善其策而不能

用七年加戶部右侍郎丁母憂帝以邊事方棘詔

潛菴先生史稿

列傳十八卷十三

三

馳驛奔喪事畢還鎮固揣知脫歡子也先日益強盛必懷異圖因上邊情十事未報而也先果分道入寇朝廷命西甯侯宋瑛撫師督戰不利惟固以居守獨完會帝信王振言下令親征振威脇文武大臣以從次大同固入謁欲言不得問車駕遂北後也先擁帝復至大同固獨與廣甯伯劉安率衆出城朝見帝命括金帛犒也先軍衆難之固曰主憂臣辱主辱臣死今主上有急正人臣效死之時而惜庫物耶昔甯俞納橐籥以救衛侯陳平用秘計以免漢祖古今皆以爲功不以爲罪倘天佑聖

朝以權道餌之脫吾君于難雖不奉命猶將爲之  
况聞命乎固請奉詔有罪當獨至不以累諸君衆  
皆曰善遂盡所有獻焉事聞戶部請下吏較勘欲  
因以中之固不爲動其事亦卒白夏年冬以城守  
却敵功累遷至左都御史爲言者所忌引去居以  
何英宗復位召固至入見便殿慰諭再三卽日拜  
戶部尚書賜白金文幣奇南帶織金雲鶴襲衣每  
內宴固必與或時偕遊西苑數賜珍果尚方食一  
時諸大臣無與比三年上疏乞骸骨帝亦念其老  
許之陛辭之日仍賜宴及鈔幣有加憲宗嗣位進  
潛菴先生史稿

列傳十八  
卷十三

三

階榮祿大夫卒年八十二固歷事五朝任邊鎮者  
二十七年前後所得璽書二百餘函章奏亦數百  
篇爲人多籌畧尤善談邊事初在大同時郭登爲  
鎮將英宗駕至城下固首議迎鑾而登一意拒守  
其後登數有戰功帝以此得返然帝卒憾登而德  
固固遂以恩寵終其身獨在大同以中貴勢焰方  
盛奏請給內官誥勅朝廷以非舊典不從爲世所  
譏云

程信字彥實休寧人洪武中徙河間舉順天鄉試

登正統七年進士授吏科給事中英宗北征偕廷



臣上疏諫止不報已而師潰土木也先南侵景帝  
命信監軍守西城上言五事曰新號令以振軍威  
募勇敢以備警急召勤王以遏南侵設武備以防  
內變養銳氣以備戰守皆見採納也先進薄都城  
都督孫鏜禦之失利急呼城門求入信堅持不可  
上言鏜小失利卽開門納入寇將益張人心益危  
趣鏜戰心効死力帝立下詔勿納鏜鏜附城殊死  
戰信與都督王通都御史楊善自城上鼓譟發火  
鎗礮石爲鏜聲援也先引退遂請勅于謙石亨移  
營關廂外號令諸將以此軍威益振景泰元年冊

潛菴先生史稿

列傳十八  
卷十三

四

封華陽王妃充副使至蜀還言道過畿輔民饑乞  
賑貸又言河間因被兵罷遣學官生徒乞復舊皆  
報可進左給事中廷議奉迎上皇時有龔千戶者  
投密書大學士高穀家言禮宜從厚穀言於朝衆  
相視莫敢發信倡同列會疏入奏雷中不報英宗  
居南宮信上中興固本十策首言敬天謂天象屢  
變請帝隆孝友之實以答天心聞者壯之三年出  
爲山東叅政督餉遼東遼東巡撫寇深奏倉官吏  
卒盜糧一石以上者死又造新斛視舊加二寸許  
信立碎而火之曰彼真盜死不足恤今故爲此斛

置人死地豈情也哉尋以憂去六年起補四川理  
餉松潘土裔作亂偕侍郎羅綺破其黑虎諸寨天  
順元年入賀時錄景泰間進言者于是畱爲太僕  
寺卿故事太僕當理營衛馬信綜核不少假借而  
是時三營大將石亨孫鏗曹欽並以奪門功有寵  
爲上言太僕竒急請改隸兵部信言高皇帝論太  
僕寺馬數勿令人知若改隸兵部馬登耗太僕不  
得聞卽有警馬不給請獨以責兵部帝是其言命  
復歸太僕二年遷僉都御史巡撫遼東建州董山  
潛通朝鮮受中樞院使制信廉得其制辭奏請先  
潛菴先生史稿

列傳十八  
卷十三

三

發伐其謀帝遣一給事中使朝鮮一錦衣譯官使  
建州初不肯承出制辭示之皆驚愕服罪乞貢馬  
以謝孛來將入寇信提兵出境外屯三月乃解會  
都指揮夏霖與總兵海寧伯董興相倚恣爲不法  
興曹吉祥姻也僉事胡鼎發霖奸賊四十事信以  
狀聞詔錦衣指揮郭英逮霖籍其家英入霖賄爲  
言虛實相半寇深因劾信輕聽鼎言吉祥主之逮  
下詔獄事白調南京太僕少卿五年召爲刑部右  
侍郎以憂去成化元年起兵部尋轉左當是時兩  
廣川陝荆襄諸路用兵信區畫方畧皆中機宜未

幾四川山都掌蠻叛師久無功進信尚書與襄城伯李瑾統番漢兵討之信至永寧自督大軍向金鵝池又分三路期會於大壩用神銃勁弩攻賊連破二十餘砦俘甚衆賊復走入天井水磨二洞洞幽暗不可入窒洞圍守月餘賊死幾盡信又陰察九姓土獠附賊還師勦之遂請分山都掌故地隸永寧芒部更大壩爲太平川立長官司論功進兼大理寺卿賜白金綵幣言官劾信上首功不實信四疏乞休不許六年春旱應詔上言延綏兩廣歲遭殺掠邊以捷聞朝以捷賀上下相蒙邊事益

潛菴先生史稿

列傳十八  
卷十三

三

壞四方流民盡聚荆襄不早區畫變且將起天子六師居重馭輕京營士馬疲耗器甲頓朽緩急可憂凡此皆宜更張之大者詔下所司尚書白圭難之未幾三邊有事而荆襄流民爲亂卒如信言時有搜勦河套之議信執不可大同守將楊信請師三萬巡邊信曰三萬人搜套則少巡邊則多卒與二萬人而其議遂罷改南京叅贊機務劾免應城伯孫繼先其黨皆謫嶺表軍府肅然明年致仕卒贈太子少保謚襄毅以功世錦衣百戶信才氣果銳然沉思曲筭顧不輕發方征川蠻詔進退生殺

皆得便宜從事信自出師迄凱旋不敢擅爵一人

擅殺一人同事者以爲言信曰刑賞人主大柄顧

闕外事不易集而假之人若幸而事集輒自專非

人臣之道且必有奇禍在南京守臣或欲預錢穀

訟獄事信曰參贊機務所以謹非常若此乃有司

職也論者以爲得體子敏政字克勤十歲以神童

薦英宗詔讀書翰林大學士李賢彭時學士呂原

中允劉翊皆當世碩儒成就之講授賢尤愛重之

以女妻焉舉成化元年進士授翰林院編修與修

續資治通鑑綱目諸書如言宋石守信王審琦不

潛菴先生史稿

列傳十八卷十三

三

預陳橋之謀周韓通李筠李重進書死節開寶八

年李煜降始罷分註書正統張世傑死之下書宋

囚之類條例皆自敏政發之又言宋太祖太宗授

受大事也當時史臣不能詳記遂啟千古之疑別

著宋紀受終考三卷當是時翰林中稱敏政學問

博瞻李東陽文章俊雅陳音性行真純爲成弘兩

朝之冠未幾詔侍講經筵尋兼東宮講讀孝宗卽

位叙進宮臣遷詹事府少詹事兼侍講學士憲宗

升祔詔議祧遷之制及孝穆皇后神主奉享之禮

敏政代太傅英國公張懋等草奏謂德祖比周之

后稷太祖太宗比周之文武俱百世不遷宜祧懿祖一廟孝穆皇后比周之姜嫄及宋之章獻章懿二后宜別廟奉祀與禮臣議合帝皆從之又請釐正文廟祀典謂戴聖劉向賈逵馬融何休王肅王弼杜預八人宜褫爵罷祀鄭衆盧植鄭玄服虔范甯五人宜各祀於鄉后蒼說禮萬言號曲臺禮戴聖等皆受業今禮記非后蒼不傳宜加封爵與左丘明一體從祀蘧瑗林放公伯寮不在弟子之列申根申黨申續疑爲一人秦冉顏何疑字畫譌誤隋王通宋胡瑗身立師道宜加封爵從祀乞別祀

潛菴先生史稿

列傳十八卷十三

三

啟聖王以顏無繇曾點孔鯉孟孫氏配享程珦朱松從祀大抵敏政議論與宋濂相表裏又請錄開國功臣後嗣又請以楊時從祀孔廟其博綜典禮類如此敏政爲人高自標置俯視其儕偶先是臺臣奏進賢退不肖敏政名在所進中當事者已有逐敏政之心矣會雨災御史魏璋遂指摘及之詔以詹事府少詹事致仕已復召還遷太常卿兼翰林院侍讀學士掌院事以憂去弘治十年起纂修會典副總裁辭不就明年服闋進禮部右侍郎又明年主會試忌之者誣敏政洩策題粥進士得金

錢無筭言官華景林廷玉疏相繼入帝逮訊午門  
所言皆不實景等調外任敏政素負時名不能忍  
辱下人要津人亦幸敏政敗汙鱗去則不可復起  
廷辨日並無相左右者敏政竟奪職致仕逾年憤  
懣卒後闡事大白刑部主事鍾祥沈文華抗疏伸  
雪贈禮部尚書敏政修眉長髯風神清茂其論從  
祀諸賢與錄開國功臣後嗣嘉靖中議禮多見施  
行有篁篋集九十卷新安文獻志一百卷宋遺民  
錄五十卷皇明文衡一百卷瀛賢奏對錄十卷子  
堦以祖信功官至錦衣衛副千戶

潛菴先生史稿

列傳十八  
卷十三

完

此皆以剛直著稱而宣力邊徼者

白圭字宗玉南宮人正統七年進士除監察御史從英宗北征土木之陷御史得生還者二人圭其一也郕王攝位簡廷臣分道募兵勤王而圭得澤州會寇退召還遷陝西按察副使民有掠食官糧者有司置之法圭惻然曰民以饑故至此可憫也杖而釋之遷浙江布政使值葉宗留亂後力請巡撫孫原貞奏蠲逋賦浙人以安天順二年進右副都御史贊理湖廣貴州軍務同南和侯方瑛破東苗水車壩等五百餘寨擒賊首千把豬倖斬各數

潛菴先生史稿

列傳十九卷十三

三

千人賊旣平會湖廣災就命巡撫有勅督造戰艦甚急僉議賦材於民圭持不可請於藩府以抽分木代造民多德之四年召爲兵部右侍郎會亭來寇莊浪命圭與左都御史王竑出贊軍務入對便殿賜賚優渥比至陝邊軍新失利寇張甚圭按兵不戰寇分道自東園堡渡河入掠圭馳至固原寇奄至從騎僅百人令悉下馬結陣以待寇衝突者三疑有伏乃引去躡擊之獲二十餘騎及馬牛羊以歸又追戰於花馬池頗有斬獲寇乃解去明年進工部尚書成化二年荆襄賊劉通石龍並聚衆

行剿通所部至四萬餘人僭號稱王撫甯伯朱永  
將諸道兵往討而命圭爲兵部尚書總督軍務圭  
與永決策深入南漳分兵遏其奔路擊賊馬坪及  
古路山斬其子劉聰及其黨苗虎乘勝蹙賊格兜  
山賊退保巖砦圭身自督戰士皆攀藤葛爭先登  
呼聲震岩谷又遣別將以勁卒千人取間道出賊  
後焚其巢斬首數千通遂就擒龍逸去未幾又追  
擒之並其黨六百三十餘人獻俘京師流民受撫  
者萬餘人奏言荆襄山谷阻深流民嘯聚往往弄  
兵今幸掃除議于房縣南漳當陽嶮隘增官分戍  
潛菴先生史稿

列傳十九  
卷十三

三

報可遭父喪歸葬明年加太子少保兼兵部尚書  
召還提督十二團營賜玉帶寶刀織金麒麟服寵  
之乞終制不許四年彗星見請分命大臣巡問疾  
苦旌廉黜貪以弭天變從之滿四之叛關中大震  
圭舉都督劉玉爲帥卒能平賊以母喪歸又詔促  
還朝遂卒于官贈少傅謚恭敏官其子錦衣百戶  
圭凝重有器度嘗會議邊務請勅王越等調兵大  
舉搜套收一勞永逸之功越奏不可乃止累典征  
討未嘗令家人冒功得官公退輒閉門靜坐請謁  
多不得通雅篤故舊有喪不能舉輒爲殯具在貴



州時人有憤中官虐欲刺之者誤入主所主擁會  
問之刺者驚曰我公也卽自刎不殊仆于地圭呼  
燭視持救善遣之人稱其雅量子鉞字秉德舉進  
士第二人授翰林院編修歷宏正二朝累官禮部  
尚書兼學士入內閣數爲考官典誥勅掌翰林院  
及詹事府事加太子少保鉞以名公卿子習聞典  
故加之問學詞翰清蔚見稱於時爲尚書時劉瑾  
用事雖稍歛遜然能不失其正焉正德五年卒贈  
太子太保謚文裕

項忠字蓋臣嘉善人正統七年進士授刑部主事

潛菴先生史稿

列傳十九  
卷十三

三

遷員外郎從英宗北征被俘爲之餉馬乘間挾良  
馬南奔馬疲輒棄之徒跣七晝夜得還遷郎中景  
泰初遷廣東按察副使按部高州諜報賊攜男婦  
數百剽村落部將請發兵忠曰流賊無家也勿妄  
殺已而有俘者訊之果良民被掠者盡釋之四年  
從都御史馬昂征瀧水謠言於昂曰此謠倚大藤  
峽恃險播惡脅從者衆難以進攻莫若懼賊以威  
諭民以德民出則賊勢弱而成功易矣昂喜以軍  
委忠監之忠遂與諸將進兵破函口關追斬其酋  
降數千人丁父憂起補山東天順初進陝西按察

使會歲饑不待報輒發廩賑活萬餘人丁母憂歸  
陝人赴闕乞畱改右副都御史巡撫其地洮岷羌  
叛忠上言羌志在鹵掠而已盡誅則傷仁遽撫則  
不威請聽臣以便宜從事報可乃發兵據險三日  
卒降其衆而還成化元年毛里孩孛羅忽爭河套  
遂犯榆林忠請選河州諸衛銳卒及慶陽壯勇禦  
之決旬不退廷議命彰武伯楊信甯遠伯任壽總  
兵李杲合三鎮兵往援薄有斬獲遽請班師無何  
毛里孩大掠延綏復遣信出討而以忠爲提督軍  
務於是効諸將擁兵觀望罪遂督諸軍大破之擒

潛菴先生史稿

列傳十九  
卷十三

三

斬五千降詔慰勞忠請合諸鎮兵十萬以明春出  
塞逐寇會毛里孩棄套東遁乃止歲大饑築西安  
及延安臨洮等城使備作力食西安水泉滷不可  
食爲開龍首渠三十里以便民汲又疏涇陽鄭白  
渠灌田七萬頃各其渠曰廣惠三年召還爲右副  
都御史四年固原土達滿四劫其從子指揮使璫  
據石城以叛旬日間衆且二萬官軍數失利命忠  
總督軍務與都督劉玉往討之集兵八萬九月忠  
至固原與巡撫馬文升相度形勢分軍七屯環城  
十餘里賊乘高拒我伏羌伯毛忠戰死劉玉被圍

中流矢軍稍引卻忠卽陣斬一千戶以狗衆奮勇  
力戰圍解救玉出忠語衆將曰賊據險可坐困不  
可仰攻也會有星亭在秦分諸將爭言罷兵忠曰  
昔李晟討朱泚不熒惑守歲乎而卒克敵今何疑  
焉石城東西皆峭壁無水泉文升請斷賊樵汲路  
賊稍稍困廷議遣撫甯侯朱永率京兵四萬濟師  
忠慮京軍脆弱不足用且永至事權必撓乃上疏  
言狀曰賊行就俘濟師無益大學士彭時商輅言  
觀忠布置必能破賊而兵部尚書程信難之忠乃  
請永循邊而西勿遽至軍而督兵攻城益急賊詐  
潛菴先生史稿

列傳十九  
卷十三

三

請降忠玉單騎至城下與四濤語良久文升率兵  
繼之直前挾濤以歸四沮喪復堅壁不出十一月  
忠遣卒由間道乘高縱火會風大作飛炬入城燔  
其棧柵而文升令軍士平濠直進賊窘多出降者  
楊虎狸者素爲滿四所信夜出汲被擒忠叱令斬  
之虎狸伏地乞効死忠乃賜以金鈎束慰遣之越  
數日虎狸果誘滿四出官軍擒之急擊下石城夷  
險阻瘞戰鬪斃石紀功還軍固原生擒者八百餘  
人械滿四及其魁黨二百人送京師伏誅請於石  
城北增設一衛留兵戍守關陝悉平初忠督兵行

間矢石雨下不少避文升勸忠持重忠嘆曰受命討賊久無成功吾義當死文升服其忠勇當石城未下時天寒甚出師且百日朝議慮賊乘間與套合關中且大亂賴忠玉文升料敵明審露宿原野者六旬卒能殄滅巨寇然朝中自彭時商輅外忌之者衆同時若趙輔劉聚王越功不能過忠輒取封爵而忠僅進一階尋召還以右都御史協理院事白圭之平劉通也諸郡邑戍守未設無何荆襄大祲其黨李原王洪等復相聚作亂流民歸者近數十萬人僭名號署官屬流劫諸郡七年命忠總

潛菴先生史稿

列傳十九  
卷十三

三

督軍務同都督李震往討至襄陽見兵單弱奏調永保土兵諸將請速進兵忠曰流民相聚山谷非爲寇也旣陷賊中不能自脫耳乃分兵列山口要害多設旗幟鉦鼓而遣人持榜入山招諭有能去賊自歸者禁勿殺衆故聞忠誅滿四名已震恐至是攜老弱來歸者甚衆先是白圭常遣錦衣百戶吳綬贊叅將王信軍因說信曰一招而賊瓦解如是安用我輩遂爲浮言以敗撫事而圭聞之亦請毋調土兵忠驚曰彼來歸者畏兵威耳且山中賊尙衆若土兵不調彼何所畏出者復入其及圖乎

乃疏論綬罪帝召綬還而聽忠調土兵如故四月  
兵大集合二十五萬人分八道進忠與震建大將  
旗鼓於房竹間賊匿老弱深山中而出精銳數萬  
以抗我師縱土兵擊之斬獲二百忠度賊出入所  
經處伏銳卒六千于山側令散兵縱馬解鞍以誘  
賊賊出伏發大敗之忠度官軍連勝賊勢必潰復  
遣父老入山招之旬日流民歸者復數萬原洪等  
伺隙出劫李震同副使余洵乘暴雨溪漲賊半渡  
橫截擊之賊墮溪死者千計遂擒原洪斬俘二千  
出賊家屬二萬八千有奇戶選一丁戍湖廣諸衛

潛菴先生史稿

列傳十九  
卷十三

三

餘附籍給田忠恐餘孽未盡復督軍入山搜捕俘  
斬八百獲器械雜畜以數千計捷聞降詔褒諭畱  
忠撫治初忠下令逐流民有司乘兵威驅迫死者  
枕藉山谷會有星孛天田言官遂指忠妄殺所致  
帝曰流民爲患中外交咨賴忠等掃除今乃追論  
耶不聽白圭亦言所上首功前後不合亦不聽於  
是進忠左都御史震左都督諸將賞擢有差忠上  
疏自列臣肅將天威克平逋寇媚嫉之徒播爲流  
言至謂彗孛皆臣所致夫荆襄寇亂遠邇荼毒臣  
斬俘者皆首惡也今諸臣言皆良家子不知前屢

奏猖獗者誰耶樞臣白圭亦嘗身任其事矣今日之舉圭之遺也蓋亦少思乎昔馬援征南蒙慧苴之謗鄧艾伐蜀來檻車之徵非惟功不見錄反致身且不保臣幸際聖明不加斧鉞然衆口爍金其實可畏乞賜骸骨勿使臣爲馬鄧之續温詔答之

竊謂此功較平滿四更烈

自是荆襄無賊患者三十餘年入爲刑部尚書踰年代白圭爲兵部尚書錦衣百戶韋瑛挾汪直屢興大獄忠奮筆草疏偕諸大臣發直瑛等奸狀會大學士商輅等亦發直十罪詞甚激切帝不得已戍瑛罷直西厥直見帝泣訴曰此內臣黃賜陳祖

潛菴先生史稿

列傳十九卷十三

三

生中奴也帝爲之調賜等南京以慰其意又以御史戴縉訟直奉法無他乃復令直領廠事如故而吳綬自荆襄還爲千戶附直用事因誣訐忠下廷訊忠抗辨不少屈竟奪官去初直用事諸大臣耻與往來已而一二大臣首結直因相引附噉言官排異已者於是大學士商輅首乞去都御史李賓刑部尚書董芳戶部尚書薛遠兵部尚書程萬里相繼去而直益橫已而諸姦皆敗大臣相繼復官忠得復兵部尚書致仕家居二十六年卒年八十二贈太子太保謚襄毅忠侔儻諳練剛直不可能

知人服善在兵部以職方司爲要樞遂調劉大夏  
陸深爲郎部務悉舉子經孫錫皆舉進士經江西  
叅政錫南光祿卿鏞以忠蔭世蘇州衛指揮錫子  
治元夢元皆舉進士自忠大征荆襄後其地幾空  
已而歲復饑流民復集有司懲前事嚴逐之而已  
祭酒周洪謨閔其事爲著流民說謂山谷曠遠民  
遭水旱正不能賑卹則轉徙其間不若因而撫定  
之使占版籍爲土著可以填實襄郟戶口又援晉  
僑置南雍州爲徵成化十二年流民大集右都御  
史李賓恐生變乃卽洪謨說上之而湖廣巡按御  
史李賓先生史稿列傳十九  
卷十三  
用史聯綴法

往蒞之

原傑字子英陽城人正統十年進士授監察御史  
巡按江西捕猾盜數百人有能名就遷江西按察  
使成化初遷山東布政使進右副都御史巡撫其  
地召爲戶部左侍郎六年巡視河南奏黃河爲患  
遷徙不常彼陷則此淤軍民就淤墾種以給口食  
供賦稅蓋取此以補彼也好徒陰結王府官校槩  
指爲園場屯地投獻徵賞王府輒便收占民不聊  
生請自今奸民謫戍王府官受獻橫占並治以法

從之遭母喪去會江西盜起以傑兩任江西能得  
民詔起復往治事平改右副都御史傑爲人廉靜  
有智畧推誠待物所至有功而區畫荆襄流民功  
尤偉荆襄之上游曰鄖陽介湖廣河南陝西三省  
間叢山密箐中多曠土元末流民入據爲亂洪武  
中鄧愈以大兵勦除之空其地正統初流民稍集  
詔御史金敬撫輯未定而還自是集聚益多無所  
稟約束黠悍者直相雄長成化初劉千斤亂尚書  
白圭勦平而戍守未設餘孽李鬍子復亂流民從  
者至數十萬人都御史項忠復討之既定下令逐

潛菴先生史稿

列傳十九  
卷十三

元

流民有司乘兵威迫遣盛夏道暘多以流以疾疫  
死十二年復大集于是勦驅策並困右都御史李  
賓請立州縣統治仍置衛所資守禦憲宗是其議  
命傑以左副都御史往撫之傑至徧歷山陘宣上  
德意延問諸流民無不忻然願附籍爲土著于是  
大會湖廣河南陝西撫按官籍之得二十一萬三  
千餘戶聽歸故土者十之一二其願留者許各占  
曠土墾治爲業流民與土著相參錯居因視要害  
析地寘縣於湖廣得竹谿鄖西於河南得桐柏南  
召伊陽於陝西得白河山陽又陞商縣爲商州卽



鄖縣設鄖陽府衛立行都司而總制以都御史得撫治八郡有事得調發三省文武吏如指臂凡設府衛各一州一縣七薦知鄖州吳遠爲鄖陽知府諸州縣皆擇隣境良能吏爲之所集流民爲戶一十九萬一百七十有奇計口三十九萬有奇墾荒田一萬四千頃有奇園上其事又以地界三省無統紀因薦御史吳道宏代已任帝覽奏大悅悉報可擢道宏爲大理少卿代傑而進傑爲右都御史由是荆襄千餘里竟以無事將還朝而左都御史王越忌之言于內閣會南兵部尙書缺吏部以侍潛菴先生史稿

列傳十九卷十三

早

郎勝 翁世資名上皆見格乃特命傑傑旣以勞成疾聞命鬱鬱不樂疏辭不許卒于南陽之驛舍年六十一八郡民間之流涕爲立祠蓋撫定流民使占籍其說雖創自周洪謨奏於李賓吳道宏等惟傑處之能盡其方畧云贈太子太保錄其子宗敏國子生

叙戰撫處銳氣碩畫如見鐵馬交馳軒車煦

沫

王竑韓雍吳琛朱英邵廷瓚余子俊徐廷璋  
列傳

王竑字公度其先居江夏祖俊卿坐事戍河西遂  
爲河州人少豪邁負氣自以生長西郵志存立功  
登正統四年進士授戶科給事中正色敢言以汲  
黯朱雲自期英宗北征陷土木郕王攝朝午門群  
臣劾王振誤國讀彈文畢王曰出待命衆皆哭伏  
地不起錦衣指揮馬順者振黨也厲聲叱言者去  
竑奮臂起捽順髮啣其面罵曰若黨權奸爲惡致  
皇帝蒙塵罪當誅今尚敢爾耶與衆共擊之立斃  
潛菴先生史稿

列傳二十  
卷十三

三

王遽起入竑率群臣隨王仍伏地哭王使中官金  
英問所欲言曰振黨王毛二闖猶在請寘于法遂  
出二人衆又捶殺之曳三尸東安門外籍振家當  
此之時竑名震天下郕王已卽帝位也先擁衆數  
萬挾上皇犯京師命竑爲僉都御史同太監興安  
提督守禦九門也先退命竑守居庸關時邊鎮累  
陷人無固志居庸都指揮夏忠等護運軍糧中道  
聞礮聲以爲寇至輒奔還竑劾奏之一軍震懾遂  
大閱士卒繕險飭戎備居庸屹然稱重鎮尋以  
疾代歸景泰二年督漕淮上兼巡撫江北諸郡首

劾巡河御史王珉貪淫謫戍會歲大祲竝引咎疏  
曰竊見山東河南抵江北徐淮自去年正月大雪  
異常夏秋淫潦廬舍漂蕩稻麥汗萊入春連月風  
雨洩寒天意不測甚爲可畏在易泰卦象曰內陽  
外陰君子道長小人道消否卦象曰內陰外陽君  
子道消小人道長今方春陽長候類秋冬陰盛陽  
微殆食祿者君子少而小人衆也伏望陛下念宗  
廟社稷之重上天告戒之切責有位之臣痛自修  
省進君子退小人省刑罰而止聚斂節財用而抑  
貢獻罷無益之工嚴無功之賞散財以收民心愛  
潛菴先生史稿

列傳二十  
卷十三

聖

民以植邦本庶人事修而天變可回臣濫居臺憲  
致此災異無所逃罪伏乞罷歸田里以答咎譴疏  
入帝下詔申勵大臣勅所在發廩賑濟然是時徐  
淮道殣相望竝不待報卽開倉發賑已而山東河  
南流民就食者聞風猝至諸廩悉竭惟廣運倉尙  
有餘積而留備京儲主以中官竝欲發之主者不  
可竝往告之曰民惟邦本本固邦甯今民窮至此  
旦夕且爲盜將上憂朝廷遑惜京儲耶公不吾從  
脫有變當先斬公以謝衆然後自請死耳竝辭色  
俱厲而中官亦素聞其殺馬順名懼而從之竝復

上言廣運所儲僅支三月請令內外問刑官自死  
罪以下得入粟于被災所在就便貯賑帝從其議  
命侍郎鄒幹賚帑金三萬兩馳赴淮徐聽竝便宜  
調度竝躬自巡問遣屬吏四出勸諭富民及沿淮  
上下商舟悉令出粟所全活者百八十餘萬人復  
業者五千家他境流移安輯者萬六百餘家病者  
有醫藥死者具棺殮乃自劾前矯制罪以其狀聞  
初帝得流民奏大驚曰吾民其饑死矣奈何及竝  
疏至喜曰賢哉都御史也活我百姓其勿劾遂進  
左副都御史仍治淮安英宗復位石亨張軌等用  
潛菴先生史稿

列傳二十  
卷十三

望

事以汰冗員左遷浙江叅政亨復追論竝是嘗首  
擊振黨者遂除名編管江夏居亾何帝于宮中得  
竝景泰中疏有正倫理篤恩義語顧左右曰竝此  
言乃爲朕也因錄治漕功遣官送歸河州天順五  
年孛來寇莊浪命都督馮宗往討詔竝以原官與  
兵部侍郎白圭參贊軍務竝與宗擊孛來于紅崖  
子川敗之班師入朝英宗慰勞備至仍令督漕撫  
治淮揚先是竝救荒時淮人歌之曰生我者父母  
活我者巡撫凶年不荒軍民安堵立祠祀之及是  
聞竝至遠近皆相慶老稚綵綵迎拜道中至數日

不止憲宗卽位言官稱竝才望可屬重任不宜久  
在外遂召爲兵部尙書時兩廣苗賊據大藤峽稱  
亂帝銳意征之下廷臣集議竝首舉都督趙輔前  
侍郎韓雍可用苗賊遂平因言總兵官征討毋得  
奏帶私人妄冒功次又請復京營軍士舊額禁勢  
家豪帥擅役營丁其言與時忤不報及薦都給事  
中張甯修撰岳正爲閣臣李賢所沮並出之于外  
竝憤然曰大臣以道事君不可則止吾可以行矣  
遂三上章乞休竝歷官十餘年在兵部僅三月而  
聲望重一時無賢愚皆信之旣歸御史吳遠等合  
潛菴先生史稿

列傳二十  
卷十三

四

疏薦竝練習邊務緩急足恃乞速起用以慰群情  
不果用家居二十餘年卒贈太子少保謚莊毅

韓雍字永熙長洲人徙家宛平弱冠舉進士授監  
察御史負氣果敢陵諸御史上嘗錄囚碭山教諭  
丘純遇膳夫過苛其父教令逃去因告純殺其子  
取河中浮支解尸以證他御史榜掠純遂誣服坐  
以極刑雍疑之踪跡得其人寃始白巡按江西衆  
猶易雍年少及視事踔厲風發糾彈墨吏五十七  
人前後御史皆不及會歲饑廬陵盜起雍與巡撫  
侍郎楊甯設計捕劇賊二百餘人悉戮之境內以

安甯語人曰韓公雖年少才百倍甯何可當也時  
福建鄧茂七反有詔江浙會征旣而福建巡按御  
史以賊且受撫止兵勿進甯曰賊果降退師未晚  
也趣進兵賊果復叛賴甯定之浙江御史初得福  
建牒止不進及賊平以其牒奏聞福建御史坐死  
人以是益知甯多大畧尋遷廣東副使大學士陳  
循知其才言于上擢僉都御史代甯巡撫江西論  
劾甯王不法事遂削護衛時甯年未三十也而諸  
所更定施行後來皆守爲成式天順初坐陳循累  
貶山西副使尋罷歸未幾召爲大理寺少卿尋復

潛菴先生史稿

列傳二十  
卷十二

星

僉都御史佐寇深理院事深素剛愎而獨心重甯  
石亨旣誅錦衣指揮劉敬坐直房邀亨午具用朋  
黨律罪死雍抗言律文交結朋黨重紊亂朝政耳  
今以一飯當之非律意也且亨盛時大臣中固有  
朝夕趨其門宴會累時者獨坐敬何也敬遂獲免  
遭母喪去以邊警起復巡撫大同召見文華殿賜  
鈔勞之曰煩卿守北門雍經畫部署不由成法邊  
備大修寇不近塞七年召還議事帝壯其表畱爲  
兵部右侍郎顧大學士賢曰安得風度如雍者而  
代之未幾又坐侍讀學士錢溥累貶浙江叅政雍

既屢進屢黜甚不得意曰從賓客賦詩選勝而已  
會兩廣寇起命都督趙輔發湖湘閩廣土漢兵討  
之兵部尚書王竑曰韓雍才氣無雙若屬之討賊  
可免南顧憂遂以雍爲僉都御史贊理軍務至則  
會衆議進取輔曰分軍蹙賊入廣西可破也雍曰  
不然古者仗鉞臨戎得制閩外苟利國家專之可  
也夫兵有合爲正分爲奇者兩廣地鮮完郡大藤  
峽賊根本也不以全師搗其本迺分兵以趨未分  
兵勢弱趨未難盡今全師據其地則南可援高肇  
雷廉東可應南韶西可取柳慶北可斷陽峒諸路  
潛菴先生史稿列傳二十  
卷十三

吳

勢若常山之蛇首尾互應彼分而拒我聚而攻志  
曰先人有奪人之心此之謂也輔曰誠如公言于  
是以雍爲才軍事一決于雍雍乃以三萬人兼程  
而前至全州陽峒西延苗賊爲梗雍首擊滅之斬  
失律指揮四人于軍門將士皆股慄至桂林雍按  
地圖與諸將議曰修仁荔浦峽之羽翼也不先剪  
除則峽勢不孤乃以承順保靖兩江土兵十六萬  
人先破修仁進至力山俘斬八千餘荔浦亦定遂  
直抵峽口有儒生里老數十人伏軍前曰我輩苦  
賊久矣今幸遇天兵得生爲良民願先馬首爲嚮

導雍顧左右叱曰此皆賊耳縛斬之左右初亦疑  
旣縛而利刃出乃悉支解分掛林箐中累累相屬  
賊大驚曰天神至矣悉反走遂連破石門諸寨賊  
復遁入桂州橫石諸崖據險立柵雍揮壯士以大  
斧刊木開道衆軍鼓噪並登賊遂大潰前後俘斬  
四千七百有奇磨崖紀功而還峽故有藤如虹橫  
兩崖間至是斷之更名斷藤峽復遣將四出雷廉  
高肇諸賊次第削平雍因請改上隆州隸潯州復  
故土官岑鐸領州事諸巡檢以有功土人爲之立  
藤縣于戶所而以蠻人從軍者李慶爲之長又請

潛菴先生史稿

列傳二十  
卷十三

四

授新會知縣陶魯爲憲職使守梧州肇慶諸郡詔  
悉如雍議進副都御史提督兩廣軍務蔭一子錦  
衣千戶雍以讓其弟而輔封武靖伯雍以兩粵遼  
遠復請重臣分理軍事尋以父喪去未幾巡按御  
史龔晟僉事陶魯林錦並以兩廣事權宜專請開  
府梧州仍命大臣總制部議以爲無如雍者再起  
復進右都御史以往雍在鎮尊嚴擬王公三司長  
吏長跪白事軍門設銅鼓數十儀節詳密賓從極  
一時之選軍務填委判斷如流而賦詩飲酒不輟

然軍府取用過侈又凡事專決爲鎮守中官所忌



遂以驕奢見糾遣使即訊無所坐竟致仕歸雍洞

達剴爽重信義臨戎蒞政決機致勝發奸摘伏如

神而事簡心平不爲崖谷盛年引歸鬱鬱以終人

多惜之年五十有三謚襄毅嘉靖初言官追論雍

功請錄其後兵部言雍故與趙輔同功運謀決策

實出於雍陶魯軍績皆雍指授其勞勩實與前總

督尙書王翺埒今輔子孫世承伯爵翺魯之後俱

襲錦衣而雍賞不延世請比翺例不報同時有張

祚者華亭人景泰中進士以御史遷廣東僉事雍

委任先於陶魯常率兵分路進討凡軍糧俱倚辦

潛菴先生史稿列傳二十一卷十三

之僅再遷秩終河南副使

吳琛字輿璧繁昌人景泰二年進士授監察御史

犒軍甘肅巡按四川皆有名英宗初石亨亂政琛

與同官糾之忤旨調知遷安縣適有雨雹之異命

還職故事三法司會讞獄囚及十三道文案必擇

御史中有才望者綜理之琛與焉進大理寺少卿

歲餘遷僉都御史巡撫甘肅西番扒沙巴哇等七

族歲寇邊累撫之不服琛與平羌將軍衛穎討之

斬獲甚衆以功加俸二級成化初以議事入京畱

佐院事時淮南薦饑奉命賑恤以便宜專決爲權

賈所嫉被誣左官代者林聰行事一準琛舊謂琛實益民未嘗負國也由是誣白而名益著遭喪服將闋適兩廣總督韓雍以艱去乃卽家命琛往代半歲雍奪情再至乃召琛還復巡撫湖廣五年西邊有寇警廷議以琛常在西陲習知兵事調琛巡撫陝西楚人遮道訴鎮守三司官連章畱之詔特報可進副都御史未幾雍致仕復推琛往知雍以驕侈罷于是矯以清約琛武功不如韓雍撫循招徠亦不若朱英最著然自雍大綱之餘因時勸誘使柳慶猺獠蒲伏聽命琛之功實多一年卒于官

潛菴先生史稿

列傳二十卷十三

冕

人又謂琛在兩粵日淺使得如湖湘時功名亦未必少遜英也

朱英字時傑桂楊人五歲而孤能自感奮通易書詩三經正統十年進士授監察御史十四年浙閩盜起帝簡御史十三人與中官分守各郡而英得處州時葉宗畱反其黨周明松等四出剽掠駸駸合閩寇時大軍尚駐金華處州道梗英從間道至榜諭脇從降者甚衆以計生致明松等數人械送慶元謀者報賊衆來劫中官大懼英立戮明松等于市賊遂散去事平還朝景帝將易儲英獨與林

聰言其不可會帝召內閣江淵議事英前語淵曰  
無故易皇太子人心大失望公當國不可不爭已  
而竟易之英與聰相向泣尋有詔風憲官被告許  
者悉外補英復極論之英爲御史有名坐是不爲  
執政所悅遷廣東參議過家省母橐中惟賜金十  
兩母曰兒居官若此吾無憂矣英至廣撫凋瘵招  
流亾立均徭法其法以十年爲限一役九休民甚  
稱便峒蠻爲亂撫之不定進兵討之其黨降者百  
餘人大帥悉欲誅之英固爭戮首惡而已都御史  
葉盛屬英督察勦賊者參將范信誣廉橫間民爲

潛菴先生史稿

列傳二十  
卷十三

五

賊欲殲之英馳赴信壘卽訊悉縱去信忿其計不  
行旬月不肯還會盛使至英密請令信班師全活  
者甚衆以事入京時林聰已爲都御史語英曰君  
沮易儲當時雖無封事盍亦自列吾能證之英耻  
於自言竟不答尋進參政遭母喪去服闋補陝西  
遷福建右布政使居二年遷陝西左布政使所至  
用均徭法民大便之尋擢副都御史巡撫甘肅會  
兩廣總督吳琛卒廷議以英熟粵事遂以代琛顧  
兩粵自韓雍大征之後民徭窮窘將帥喜邀功張  
大聲勢利在俘掠各爲鵬勦英至則以守易政揭

榜購誅首惡脇從歸服許爲編戶約飭將士無得  
恫張先後平鬱林木頭諸蠻招荔浦馬平蒼梧陽  
朔諸獠凡爲戶四萬三千六百丁十五萬田糧萬  
五千有奇復請建永安州以處降蠻兩粵以靖賜  
勅褒諭進右都御史食祿從一品田州知府岑溥  
與從子思明知府欽久內屬酋長黃明烝溥祖母  
因間欽以叛總兵請用師英曰何事于兵吾將使  
岑氏獻其首耳遣間使諷欽誅明以雪耻欽感泣  
斬明傳首軍門交趾老撾治兵相攻邊臣入告帝  
問英處置之宜對曰交趾蕞爾國不過與老撾爭

潛菴先生史稿

列傳二十  
卷十三

至

甌脫耳遣使諭之當卽悔懼帝從其言交趾果上  
表謝罪貢方物如舊其爲治以明決佐其持重皆  
此類也在粵十年召還掌院事考滿加太子少保  
卒于官贈太子太保英與韓雍吳琛俱以御史起  
家有名先後總督兩廣雍雖平寇有功顧爲人恢  
濶自奉贈遺過侈因得謗去琛務爲謙抑有所贈  
遺纔及金帛輒辭不受至英益標清節妻子不從  
之官惟一老蒼頭給侍而已有時璽書旌以金幣  
英受藏璽書貯金幣於庫自言吾蒞官苟得爲民

省一錢還室神氣頓爽英在甘肅積軍羨三十萬

在兩粵四十餘萬悉付司計者不上聞或問之答曰此邊臣常分何足言人謂英知大體云正德中追謚恭簡

鄧廷瓚字宗器巴陵人景泰五年進士知淳安縣多惠政而無赫赫名九載未遷巡撫廣西都御史張鵬獨知其才薦知梧州府會丁母憂去服除遷太僕寺丞時貴州新設程番府地在萬山中夷獠雜居吏部難其人特推廷瓚爲知府廷瓚悉心規畫凡城郭衢巷廟宇廨舍以次興造榜諭諸獠使受約束政平令和莫不感悅墾田不踰界入市不潛菴先生史稿

列傳二十卷十三

至

二價四境晏然寢知禮讓巡撫陳儼以廷瓚治績異等奏請久任九載始遷山東參政尋進布政使弘治二年擢右副都御史巡撫貴州時黑苗稱亂滇蜀道梗勅廷瓚提督軍務同鎮遠侯顧溥統兵八萬討之始至招撫不從乃調兵食決策征勦苗逆順雜處廷瓚布檄山谷順命者撫之臨陣號令嚴明將士無敢踰越破砦百餘擒其渠首獻俘京師斬獲八千招還流移五千餘戶捷聞降勅褒嘉廷瓚奏言都勻清平二衛九長官司其人皆世祿

驕恣殘虐苗民致使生亂四十餘年軍疲戍守民

困轉輸今幸元愨就除非大更張不可請改爲郡  
縣流官與土官兼治之於計爲便詔曰可于是始  
設都勻府一獨山麻哈州二清平縣一更置官吏  
具如廷瓚議八年召爲左都御史掌南京都察院  
事僅數月出爲提督兩廣軍務鎮梧州自都御史  
韓雍平大藤峽後率選憲臣有才望者鎮撫其地  
多以威嚴爲治廷瓚一鎮以簡靜凡事總大綱而  
已屬吏有賢者輒薦舉或不職特去一二太甚者  
奏汰諸冗員曰祿奉出於民毋徒費也顧群蠻以  
劫掠爲常往往出沒閩楚間廷瓚言都御史金澤

潛菴先生史稿

列傳二十

卷十二

七

巡撫偏方非宜請以江西一省付澤而使二司聽  
節制庶可調度兵餉遷衡州兵備治所于郴州以  
便控制又以廣東瀧水爲賊巢宜卽其地設千戶  
所調軍守禦給隙地屯田爲久遠計上悉從之廷  
瓚於群蠻結以恩信兵不輕發若鬱林川雲甌大  
桂諸種作亂以次討平其後四會諸下縣饑盜竊  
發勢尤熾廷瓚設法擒李景先覃傑等二百餘人  
餘解散歸農兩廣無事廷瓚性樂簡易自爲州縣  
至大寮處事求濟待人不疑雅量廓如莫窺其際  
至所設施動中機宜人莫能及也自梧州召還復

命掌南京都察院事未行卒贈太子少保諡襄毅

余子俊字士英四川青神人父祥戶部郎中廉介  
重信義子俊少孤才畧開敏登景泰二年進士歷  
戶部郎出知西安府城中水鹹飲輒病爲開新渠  
引灞澂水貫城市人得戶汲號余公渠又涇陽洪  
日堰山高水下不利灌輸乃鑿山開水道灌田千  
頃居六年以治行考最賜璽書旌異超擢陝西布  
政使時會討滿四供餉立辦成化八年擢副都御  
史巡撫延綏初正統中都督王禎始城榆林置十  
八砦成化中始置衛而規制褊隘子俊請廣其城

潛菴先生史稿

列傳二十  
卷十三

焉

增築營堡以陝中詭漏軍籍及罪謫南戍子孫不  
習南土者皆聽編伍實之建學立官師擇其少俊  
補弟子員又教軍士樹蔬果開界石拓地屯田歲  
得糧十餘萬石由是榆林始爲重鎮是時迤北部  
落入河套久不出帝數遣文武重臣督諸軍禦之  
子俊疏言陝西三邊延慶最近內地國初遠斥邊  
寇黃河外盡延慶無馬跡至正統初稍渡河殺掠  
始沿邊立界石創營堡築墩臺天順以來偵我東  
西諸邊各據險難犯唯延慶地無險阻利馳突數  
來侵犯掠我邊人爲嚮導遂知河套所在入屯其

中而我列戍守禦反在其外宿兵旣無窟息芻餉費且億萬臣以爲沿邊界石一帶墩臺空處築牆立堡其間多高山峻厓依山隨勢或剗或築或加挑塹縣引相接爲邊牆便報可于是東起清水營紫城砦西接窟夏花馬池東西二千里每三三三爲對角敵臺砦連比不絕空處築臺如新月狀以瞭敵避射凡堡十有二厓砦八百一十有九小墩七十有八大墩一十有五役兵四萬餘人不三月告成自是塞外偵騎望之齧指去十二年移鎮陝西討平岷州叛羌賜勅獎勵條上安民選將之方

潛菴先生史稿

列傳三十卷十三

堯

朝廷皆議行之十三年入爲兵部尚書子俊在邊久熟知敵情將校勇怯道里險易出入所由凡邊臣奏議從中調度輒中機宜以母憂去服除改戶部尚書加太子太保秋大同報警命總督宣府大同山西三關軍務以爲戰車可當鐵騎繪式奏上試之不果用寇亦引去尋召還會星變上言乞罷土木重鹽法停濫恩禁爭利杜貴倖之乞閒田罷中官之預外事帝皆嘉納二十二年再出總督宣大子俊果銳有爲當鎮撫延綏時創立邊牆謗怨蠡起卒堅執以成功至是欲推榆林法盡修宣大



兩鎮邊墻事已得請而忌之者衆交章論劾至遣工部杜謙等勘報奏言子俊在鎮二年用官銀一百五十萬兩糧料二百三十餘萬石勞民耗財不爲無過奪太子太保以左都御史致仕歲餘復召爲兵部尚書以疾乞休不許溫旨賜賚有加會楚蜀大祲慮有變奏遣將臣鎮壓以銷未萌疾且革猶屢問章上得報否或曰章猶未下側身面內而卒年六十一贈太保謚肅敏子俊外和內嚴正不許俗廉不市名奏對符檄援筆立就文簡義該平生仕宦多在西北而榆林修邊之功最大嘗曰人

潛菴先生史稿

列傳二十一  
卷十三

五

臣事君當隨事盡力凡有建樹卽近且小亦必爲百年之計又曰大臣謀國遇大利害當身任其責豈得養交市恩爲遠怨自全之地又嘗極論都御史陳鉞希汪直意開遼東邊釁宜寘重典貴州守將請合兵討播賊子俊謂賊在四川而貴州請討必要功也奏請勿許百戶韋瑛以附汪直謫戍矣告人妖言謀變子俊拒不問瑛白所私太監張善定屬有司捕繫百餘人欲燬成獄子俊曰是當歸之法司廷鞫皆妄遂斬瑛餘悉遣去其慎重如此子寘以廢累官錦衣衛同知忤劉瑾調南京孫承

勛承業皆進士承勛翰林院修撰承業雲南按察司僉事

徐廷璋字公器羅山人性豪邁有才畧景泰二年進士授工科給事中上言七事畧謂師保之官惟人不求備今每部增尚書都察院增左右副僉都御史三十餘人徧加宮衛各器濫矣教職之選宜用副榜舉人取備師資今專取歲貢監生儒士充位素無積學問難茫然所儒陋矣科舉歲貢宣德正統間例無冗濫今二者增額四倍煩耗無益土路蕪矣天子綏來萬方不貴異物近年蠻裔屢貢潛菴先生史稿列傳二十卷十三 善

金銀寶石火雞白鹿之屬未足爲祥而驛送騷然煩費遠人窺中國矣國家特遣封疆大臣鎮撫要害今河南山東湖廣浙江皆內地可省巡撫而并力于遼東永平紫荆各邊境且母令久任以滋熟玩則封守固矣京師地稱首善天下所取則今節序男女溷集焚香寺觀風俗以壞而小臣阿附大臣奸邪滋長政府不清並宜禁治以正百官萬民者也疏入景帝報曰朕初嗣位故加舊臣以公孤之職餘可采用遂省四巡撫久之以憂去天順五年遷兵科都給事中時錦衣指揮門達事敗命廷

臣會鞫衆猶畏達不敢言廷璋怒叱校尉刑訊達  
乃伏辜八年擢右僉都御史巡撫延綏成化元年  
改甘肅奏邊陲方畧所言決功賞任智勇二事稱  
旨命亟行之八年改巡撫寧夏擊邊寇有功指揮  
以下加級者三十五人又多修治邊墻塹山堙谷  
亘數百里邊人以爲保障當是時余子俊巡撫榆  
林馬文升巡撫陝西廷璋名蹟次于余馬稱關中  
三巡撫然邊隅不靖間苦侵掠九年兵部尚書白  
圭奏稱廷璋剛方有爲未爛軍旅請與湖廣巡撫  
吳琛更調以盡其才帝不允會叅贊軍務左都御  
潛菴先生史稿列傳二十  
卷十三

吳

史王越奏韋州之捷兵部奏驗所斬首多中國人  
面目官兵妄殺冒功而巡撫徐廷璋有疾並未督  
陣宜案治帝命科臣勘實以聞是年寧夏地數震  
帝雖置前事不問而廷璋已倦邊事十一年致仕  
去

竝雍英子俊皆恢有用之才其叙賑饑征大

音合藤治榆林濃腴有史法

卷十四

睢州湯

斌潛菴擬

同里田蘭芳箕山評

斌潛菴擬

金濂張楷張瓚孫仁汪浩陶魯孔鑄毛吉童

軒張海列傳

金濂字宗瀚淮安山陽人永樂十六年進士授監

察御史風裁嶄然建白爲多宣德初巡按廣東廉

名甲於一時正統元年出爲陝西按察司副使時

征朶兒只伯督餉軍中以功擢僉都御史提督甯

夏軍務濂有心計善籌策儲胥充裕西陲晏然尋

潛菴先生史稿

列傳二十一  
卷十四

一

進副都御史還京奏對稱旨拜刑部尚書十三年

沙縣民鄧茂七反初遣都督劉聚等同僉都御史

張楷討之久無成功朝廷以聚等兵寡不足滅賊

乃勅甯陽侯陳懋保定伯梁瑤平江伯陳豫都督

范雄董興率京營二萬人及浙江江西都司軍合

四萬七千人會討而以濂叅贊軍務當是時帝念

茂七本良民有司撫御失宜遂至挺而走險下詔

赦脅從禁株連又用戶部主事孟玘言勅諸將分

道並進預據要害以防奔突訓勵諄復更以楷等

遇敵逗遛降旨切責先是楷等敗書疊聞至是見

朝廷震怒又大軍將至而賊圍延平日久乃奮發  
與劉德新設伏攻之茂七死餘賊復擁其兄子伯  
孫據九龍山接戰濂與陳豫及楷合兵列陣山口  
掩旗息甲出羸卒以誘賊而別選清兵伏其山後  
賊果空壁來攻伏兵乘虛入據其營盡執其家屬  
賊退無所歸副使邵宏譽統兵繼之遂獲伯孫捷  
聞帝以閩寇稍平令楷等旋師討浙寇而以餘黨  
付濂經理濂亦不能大有所勦除御史顧瑄等上  
章糾劾詔勿問土木之難戶部尚書王佐死乃調  
濂爲戶部尚書加太子太保時邊事方殷濂志期

潛菴先生史稿

列傳二十一  
卷十四

二

濟國會官集議樽節糧儲便宜十六事以聞大約  
減歲祿裁冗官停二俸並支罷師生會饌諸費綜  
核纖細怨謗不恤一時國用軍需賴以不匱時瓦  
刺遣使進馬及送使臣高能等來朝帝欲斷其往  
來不復遣使濂言遣使通和行之已久一旦謝絕  
恐啟邊釁今人民凋敝倉廩空虛緩急誠爲可慮  
且曰漢高帝以三十萬衆困于平城何況今日若  
遽欲雪恥復讐恐非萬全之計帝曰遣使與否朕  
自有處平城之事非所宜言景泰二年詔免天下

稅糧濂慮經費日絀移文停徵米麥其銀布絹絲

徵輸如故有司追呼加切民頗怨望學士江淵給事中李侃皆以爲言科道因交章劾濂身總邦計使朝廷失信於民且發其私家數事詔下都察院獄濂上章自列尋詔削其宮保調工部未幾吏部尚書何文淵以經理財賦非濂不可乃還戶部旋以易儲復宮保致仕卒遣官諭祭仍以軍功追封沐陽伯謚榮襄厚賻其家濂性廉介剛果然褊急不能容物接下多暴怒在刑部值王振用事數以私怨興獄而濂持法又頗刻深士大夫以是少之爲、雪、無、辨、之、冤、大、是、是、非、之、正至謂承望振意未必然也

潛菴先生史稿

列傳二十一  
卷十四

三

張楷字式之慈谿人永樂二十二年進士宣德初奉命督關中車騎從北征先期而集還受監察御史有巨盜繫刑部獄吏受賕陰脫之楷劾罷尚書趙珣以下十餘人名聲大振歷陝西僉事副使時靖遠伯王驥巡邊楷上安邊十二策于朝多見采納正統十二年擢左僉都御史畿甸蝗勅楷往馳行八郡捕之真定知府慢令奏請枷號衆皆震悚蝗災爲息福建鄧茂七反衆至數萬詔御史丁瑄乘傳往撫而以楷監左都督劉聚及都督僉事陳榮陳詔劉德新等兵往討之至南畿分遣德新由

江西建昌會邵武而自以三千人由浙入閩時處  
州賊葉宗畱掠鉛山道梗楷軍至廣信不得前聞  
人趣楷進軍者相屬而浙東諸司請楷便宜擊宗  
畱巡按江西御史韓雍亦言宗畱猖獗郡邑危在  
旦暮皆國事也豈忍坐視楷不知所從指揮戴禮  
願往勦之楷乃使將五百人往戰黃栢舖殺傷相  
當宗畱中流矢死賊退保陰漿源山復擁葉希八  
爲帥而茂七悉衆趨延平瑄率官軍嬰城固守遣  
使馳迎楷麗水盜陳鑑湖者率所部附茂七亦與  
希八等聲援相聞希八等見官軍趨閩急復出掠  
潛菴先生史稿列傳二十一  
卷十四

受命討賊今延平事急而鉛山不通我輩逗遛不  
進祇遣一部將往朝廷知之何所逃罪楷乃屬榮  
兵二千人會禮擊希八等而鑑湖從旁設伏夾擊  
官軍大敗榮禮死焉事聞朝廷以楷等兵少慮不  
足滅賊乃命齊陽侯陳懋尚書金濂統京營及江  
浙兵四萬七千人往討楷謂劉聚曰賊聞大軍至  
必有懼心可因以搆之卽具榜遣人馳諭威信時  
賊移圍將樂劉德新乘夜襲破之圍解而寧陽侯  
大軍亦至楷方駐兵建甯乃陰致賊黨黃琴羅汝

先爲間諜誘茂七復攻延平于是設伏後洋沙溪  
而以輕兵挑之佯敗賊追入浮橋瑄督軍出城突  
擊賊遂大潰茂七中流矢死楷遂斬其首露布以  
聞都督僉事徐恭討陳鑑湖未克楷旋師協擒之  
景泰元年回朝先是言官劾楷逗遛罪英宗屢下  
詔切責及茂七之死實由丁瑄督指揮劉福之功  
楷掩而有之福不能平因訟其事甯陽侯以聞詔  
免官歸里天順初得復官致仕明年楷入謝會陝  
西用兵使督軍餉還爲南京右僉都御史入賀卒  
于京師楷喜吟詩其征閩也言官論其耽詩玩寇  
潛菴先生史稿列傳二十一  
卷十四

五

又居官頗縱弛無廉介之譽其再起也或言因賂  
曹吉祥得之故人競振暴其短或至過實云

始終叙征鄧茂七一事文頗詳委

張瓚字宗器孝感人正統十三年進士初爲工部  
虞衡司主事有聲郎署間嘗從尚書石璞督餉陝  
西河南又從侍郎趙仁塞決河于沙灣並以才見  
稱遷郎中天順四年出知太原府丁父憂服除補  
甯波有中官福住者監市舶怙勢肆虐瓚條上其  
罪住及其黨皆伏法瓚直名震一時出爲廣東叅

政遷浙江左布政使成化十年擢右副都御史巡



撫四川蜀中苗番雜處地險隘而民好亂瓚欲以教化撫綏其民乃編教令數十條使吏入山遍諭之十二年播州宣慰使楊輝奏本州舊有天壩干諸寨近爲生苗竊據數擾邊勅瓚便宜行事而是時松潘茂壘諸番皆竊發攻圍城邑殺傷將吏朝廷以地荒遠旣寬諸將失律之罪而詔瓚兼督松茂安綿諸軍事瓚以松潘險僻運道艱阻未可輕舉而播州生苗占據內地宜先剪除遂率兵至天壩于曉以威信賊峒強如故乃督軍與輝等分道夾擊破寨十六斬首四百餘級降者以萬計置安潛菴先生史稿

列傳二十一  
卷十四

六

甯宣撫司而還事聞降勅獎勞瓚以母病乞歸中路聞喪而松茂諸番復挾蠻部以叛詔奪情視師乃馳還至軍審度形勢自松潘至威茂皆複嶺相屬路險隘而松潘茂州壘溪三城爲蜀西塞洮河江漢之源皆出焉古維州舊壤也自三城無備故番人得闌入爲寇出沒安綿江油石泉間瓚乃檄總兵官堯彧及叅將孫嵩分駐其地爲聲援而乘間修河西舊路作浮梁治月城避偏橋棧道自是轉輸稱便爲持久之計十四年六月會師攻白草壩西坡禪定數寨斬獲亾筭曲山三寨負險自保

復進兵擊破之諸番望風降附先後破寨五十有二降寨一百有五展拓茂州城池增置墩堡留兵戍守遂上疏班師朝廷嘉其功進戶部左侍郎辭歸終制南京御史郭經等上言四川西塞重地巡撫未易得人乞留瓚經理不報十五年起左副都御史總督漕運兼巡撫鳳廬等府卒于官瓚才氣過人喜以功名自見忌者或咎其啟釁生事然能熟諳番情知地形險易威望聞于西南人亦莫能過也

孫仁字世榮貴池人景泰二年進士奉命覈永平

潛菴先生史稿

列傳二十一  
卷十四

七

山海邊餉賜金勞之明年授南戶部主事天順中歷工戶二部郎中嘗提督濟甯閘河再督糧京畿監戶部倉七年出知順慶府以憂去服除補西安時方征固原仁轉餉給事有詔優獎尋遷本省叅政累進左布政使會四川巡撫張瓚被召赴闕遂以仁爲右副都御史代之瓚旣大破松茂諸部及仁代帝亦稍厭兵屢詔鎮巡官毋擅啟邊釁卽有警當以撫諭爲先故仁一以簡靜爲務時召其渠率諭謹守約束是時諸部亦新經創多不振故蜀

民益得休息仁益設關隘嚴守禦使人得保聚爲

久安計乃奏以僉事范純爲大壩兵備副使備攸  
州生苗以都指揮劉昇守礪門紫石指揮使陶亨  
守越檣備黎雅三州番羅諸族又以都指揮李鎬  
爲松潘叅將備龍州安綿石泉諸蠻經歷歲月次  
第彌縫其闕置戍多于瓚時其他緣邊僻邑壤接  
羗番俗獷悍難馴者則皆分地立縣或陞縣爲州  
或易置長吏以治之而已終仁之世未嘗大用兵  
惟平黑虎等三寨然亦皆先撫諭降三千餘人而  
黑虎賊首猶拒命始勒兵捕斬數十級焚其寨而  
還其後火掌壩諸番糾衆阻絕糧道仁已得請出

潛菴先生史稿

列傳二十一  
卷十四

八

師會招討司禽其渠以獻師亦旋罷番漢之人並  
安之故仁雖無大戰功而名與瓚等二十一年進  
戶部侍郎因乞骸骨歸仁爲人能持重養威未嘗  
因事倖功蒞蜀八年善拊循百姓以禮遇士大夫  
宋濂墓在成都毀于水仁爲遷葬適蜀王府承奉  
宋昌作壽藏于成都東門外遂請以葬濂昌以濂  
名臣且同姓許焉時論兩賢之

論曰甚矣任事之難也張瓚帥蜀服叛定亂之勛  
于西南爲最著然當時或譏其啟釁及張大鮮實  
者此與李德裕經畧維州而牛僧孺忌其成功何

以異哉孫仁當廓清之後繼以休息非其才有不能亦措置之勢則然觀其防維周密爲數世計功亦不在瓚下矣

論二人爲稱情

汪浩字弘初石首人景泰二年進士授南京大理寺副天順中遷四川按察司僉事蜀地險多盜有司莫敢問浩募選壯士躬自訓督出入險阻成夔潼嘉諸賊以次就俘自是才名著聞就擢都察院右僉都御史巡撫其地成化初都督何洪指渾楊英等爲反賊趙鐸所殺鐸勢益猖獗童軒以討賊潛菴先生史稿列傳二十一卷十四

九

無功被逮浩奏請調兵會勦憲宗命廣義伯吳琮僉都御史吳琛等率京兵以往未至浩申明賞罰鼓勵將士綿竹典史蕭讓率里長王志恭等奮勇擊敗賊衆鐸勢遂沮引其黨趨彰明縣千戶田儀等設伏梓潼道上叅將周貴率兵直擣其巢鐸倉皇奔石子岡儀麾兵斬之或曰龍州土兵殺鐸不之識也儀給取其首傳送成都遂罷征西之師浩乃奏要害之地設隣水樂至東鄉資陽四縣以控制之報可三年山都掌蠻叛命襄城伯李瑾兵部

尚書程信討之至永甯衛集議方畧衆謂賊據山

若路險峻驟難撲滅浩慷慨言曰賊恃險爲民害  
久矣今將軍率大兵至若不一創賊將益蔓請爲  
公身任之信壯其言明年二月信定議分五軍並  
進都督芮成自戎縣入都御史陳宜叅將吳經自  
芒部入都指揮韓忠自普水入貴州總兵南  
伯毛榮爲左哨自李子關入而浩率叅將宰用爲  
右哨自渡船舖入俱會大壩榮先進浩繼之賊憑  
高倚險鏢弩礮石亂下諸軍萬弩仰射賊多被傷  
遁入深箐于是乘風縱火焚其屋廬蓄聚殆盡其  
龍背豹尾等若皆克斬五千餘級擒三千人獲銅  
潛菴先生史稿

列傳二十一  
卷十四

十

鼓四十捷聞降勅獎諭賞賚有差尋遷右副都御  
史初長甯人侍讀周洪謨建議山都掌蠻地設長  
官司戎縣流官專轄漢民帝善之下鎮守巡撫宣  
諭諸蠻諸蠻大悅詣叙州見都督芮成貢馬謝恩  
成勞之浩與成議立都掌箐前大壩三長官司令  
諸蠻自擇首領疏上行鑄印矣戎縣人不利土官  
者詆成所招諸蠻梟雄可慮宜乘機誅之浩以爲  
然自成都馳至戎縣諸蠻來迎浩責讓之伏甲出  
立殺二百七十餘人成聞之怒然畏浩不敢自異  
遂誑稱蠻初降復叛竟以捷聞餘蠻忿甚遂赴貴

州詐降都指揮丁實等迎入伏起殺官軍五千人  
浩聞變夜奔長甯賊追之不及呼于城下曰是周  
侍讀使都御史殺吾父兄誓屠此城無遺也既聞  
戎縣人劫其家乃解去自是攻掠無虛日縣官請  
浩告急浩輒怒曰我方奏捷何又有賊耶捶之幾  
死然賊終欲求撫乞改設土官貢馬如故不敢言  
殺父兄事浩以前纓抑不與奏至是大軍會勦雖  
幸成功而浩與成終不相能訐奏被逮廷鞠浩杖  
死多人帝亦素聞其暴戾特降旨謫戍獨石衛而  
成亦貪縱不法僅鑄二級論者以浩殺降致亂功  
潛菴先生史稿列傳二十一  
卷十四

七

不敵過云其破大壩也賊遁入凌霄城城險峻不  
可登其南深箐數十里無人跡叙南衛指揮使李  
鑛率三千人梯雪嶺再宿至其下賊不覺也故破  
之斬三百餘級墮崖死者甚衆後叙功獨不及鑛  
時論惜之

陶魯字自強鬱林人父成起家舉人累官浙江按  
察司副使正統十三年處州賊葉宗畱等逼蘭溪  
成晝夜警備擒其黨與數百人降者二千餘人宗  
畱遁入温台山谷間久之其黨陶得一復出攻武

義武義故樹柵爲城成方督兵力戰賊伏謀燒柵

不支遂遇害事聞贈浙江布政司右參政魯年二十以父任授廣東新會縣丞知縣王重奇之授以經魯日從重後堂授經出治丞事無何學益進魯爲人慷慨饒智計能斷大事顧倜儻不事規檢形貌頽然日日當謁上官令尉咸集魯嘗昏睡後期至遭笞罵益放意自若總督兩廣都御史韓雍之討大藤峽也威儀環衛甚盛自監司以下輒長跪受教魯隸麾下日久無所見長有猾賊最剽黠所居峒又在惡溪密箐間屢攻不能破雍方畫筴深思魯執食器徘徊根闌間雍微見之叱曰丞乃平

潛菴先生史稿

列傳二十一  
卷十四

七

視我且揣我何事魯歷階應曰公得毋以某峒事耶此甚易耳雍怒戟手言曰賊扼險塞自固吾提兵深入所部文武將吏不下百十人顧無一勝任者若言易何也且若丞一邑不能辦安能辦賊若狂悖應受笞當是時環戟門將吏皆失色莫敢仰視魯抗言曰明公奈何輕量天下士夫所謂賊難破者非破賊難也難其人也明公讀古史抑嘗見有蔣琬龐統其人乎彼皆治一邑不稱卒爲蜀名臣明公第不用魯耳誠用魯此區區者請爲明公破之言未畢雍立起改容曰吾今任若所爲

然須士卒幾何曰三百人雍少之魯曰足矣出樹  
幟下令軍中日有能力舉百鈞射中二百步者立  
幟下再試三軍之士十五萬之眾及格者僅二百  
五十人復募數日又得五十人魯曰吾事濟矣與  
三百人俱冒矢石拔砦先登遂大破賊斬首無算  
所俘獲錢帛子女悉分予三百人氣益奮當是時  
賊聞陶家軍至卽抱頭竄遇則自縛乞活無能有  
所枝梧督府兩廣勁卒往往俱出三百人下雍所  
籍以平賊者魯功爲多會重死卽代重爲新會知  
縣無何遷廣州府同知仍知縣事歷廣東按察司

潛菴先生史稿

列傳二十一  
卷十四

三

僉事副使進湖廣按察使左右布政使皆奉璽書  
兼廣東副使并治廣西時人稱爲三廣公魯自丞  
至布政使平瀧水後山賊置從化縣平恩平陽江  
賊置恩平縣平新甯白水賊置新甯縣凡所置縣  
輒立學宮以興教化爲先又平潯梧荔浦府江田  
州諸賊凡斬二萬一千四百餘級撫十三萬七千  
人兩廣倚以保障者四十五年卒賜祠新會錄其  
後一人爲錦衣千戶

孔鏞字韶文孔子五十八代孫也高祖克信元季  
僑居長洲父友諒舉進士知雙流縣多政績擢刑



科給事中卒鏞少孤力學時督學御史孫鼎教人  
務先德行置敦本籍列鏞名于首鏞用是益勉勵  
登景泰五年進士知都昌縣分戶九等以定民賦  
設倉水次以便收歛民甚利之尋以弟銘尚甯府  
郡主改知連山縣連山壤接昭賀猺獞出沒無廡  
宇可居俸給皆絕鏞訪知民所在親往招之望見  
皆驚走旣而炊飯民舍輒畱錢償其值民漸親鏞  
相率還鏞慰勞賑恤俾復故業教以耕織戰守道  
路漸通縣治以復會御史葉盛督兵征廣西檄鏞  
隨軍鏞所至招徠皆聞風降附諸將有妄殺人者

潛菴先生史稿

列傳二十一  
卷十四

古

鏞嘗力爭全活甚衆以薦遷知高州府府數破寇  
先是守者皆齷齪無大畧民自遠來奔率閉城門  
弗納遂爲賊所殺又疑城中人爲賊戚屬株連加  
屠戮賊以是激怒其衆外攻內應率致城陷鏞至  
乃開門悉納來者加意撫摩爲義塚城外以瘞民  
之疾疫死者自是流亾日歸城不能容于東北隅  
築新城以居焉時賊屯境內者千計而鄧公長馮  
曉二人爲之魁公長屯茅峒曉屯化州屢招之不  
從鏞一日晨起屏驪從以羸卒四人控轡出城直  
抵茅峒道遇賊徒告曰我新太守也爾當導行漸

近峒林木蔽虧羸卒逸其二公長驟聞太守至不知所爲亟呼其黨環甲出迎鏞已至下馬入坐庭中公長見鏞坦易甚且從者止二人與其徒皆卸甲羅拜鏞使前諭以禍福如家人語賊徒有泣下者曰吾未晡食當設草具公長跪上酒食既食曰日且暮願留宿山中夜解衣酣寢凡再宿而返公長遣數十騎送之城中人皆驚以爲太守且爲賊所執鏞使數十騎止城外而獨與羸卒入城取穀帛使載之而歸公長益感泣遂自焚其巢率黨千餘人來降公長旣降諸賊次第納款獨曉恃險未

潛菴先生史稿

列傳二十一  
卷十四

五

服鏞選死士三百人乘夜抵化州曉不意兵至倉皇出匿獲其妻子以歸撫恤甚厚曉聞之亦大感泣遂以其黨五百人降境內悉平事聞賜璽書褒美遷按察司副使遭母喪服除改廣西峒獍聞鏞各相率遠遁遷廣西按察使又遷布政使遂擢右副都御史巡撫貴州賜勅便宜行事時清平部苗阿溪者桀驁多智其養子阿刺以勇力相資橫行部落中守臣皆得溪賂驕不可制鏞以問監軍總帥皆爲溪解鏞乃行部至清平聞指揮王通頗明

大義優禮之詢以時事通條對甚悉而獨不及溪

鏞曰吾聞此中事阿溪爲大若不宣何也通默然  
再問終不對鏞曰吾以若能辦大事今庸人耳通  
曰公毋以阿溪爲也通言之而公事辦則一方受  
福不辦公將損威而通且赤族矣顧溪所恃者二  
人曰指揮王曾總旗陳瑞公必欲致溪先得此兩  
人則溪乃可圖也翼日鏞大會將校曰吾欲擇一  
人堪巡徼者因熟視曾曰可衆出鏞謂曾曰汝何  
得與賊通曾大驚辨不已鏞曰阿溪歲賂上官皆  
汝導之不服斬矣曾叩頭不戰言鏞曰吾今貫汝  
欲取溪計安出曾曰阿溪不易得也必更得陳瑞  
潛菴先生史稿

列傳二十一  
卷十四

六

謀之乃可鏞曰汝爲我呼入瑞入鏞訊之如曾瑞  
屢顧曾曾曰明公已知之矣第當相盡力耳二人  
卒以計擒溪刺磔之境上群蠻震懾邊徼無事鏞  
素秉清節先時自廣東還家人私攜一英石旣至  
舟矣鏞怒而投之水中鏞歷仕三十餘年皆在邊  
陲觸瘴成疾上疏乞骸骨不許弘治初召爲工部  
侍郎行至富陽卒年六十三卒時日正中白氣自  
舟尾上貫天表一大星熒熒然人目之爲孔鏞星  
同時有信宜知縣李時敏平樂人亦以才幹稱嘗  
平廣賊亂以功遷化州知州粵人並稱孔李云

毛吉字宗吉餘姚人少補生員教官以質薄朴之  
吉不平起碎所衣衫出乃以儒士中鄉試景泰五  
年舉進士授刑部廣東司主事故事十三司分理  
在京刑獄而廣東司當治錦衣衛卒衛卒天子親  
軍主陰刺百司事故號橫而是時掌衛事門達尤  
縱惡雖大臣稍失意輒搆以重法以故皆震恐卒  
有犯下司悉好遣之莫敢問至吉獨法治不稍貸  
卒大憾羣訾吉曰毛葛刺云吉嘗遇門達西街諸  
官引馬避去吉獨于馬上舉鞭抗揖過達愕然顧  
左右曰誰也左右曰是所謂毛葛刺者也於是達  
潛菴先生史稿列傳二十一  
卷十四

怒百計求吉過會吉以病誤朝參下衛衛卒聞之  
喜且走白達曰毛葛刺至矣掄巨杖杖之骨見幾  
死旣而復職卽繩錦衣卒如故稍進至郎中遷廣  
東按察司僉事分巡潮惠二府黜墨吏摧強宗陰  
除奸宄爲民患者民大悅久之當代百姓詣撫按  
乞畱者以萬數方是時劇賊楊輝據程鄉之寶龍  
峒而其黨曾玉謝瑩據龍歸石坑已攻破安遠上  
杭將還攻程鄉于是撫按具疏畱吉乃料民壯檄  
旁近官軍得七百人裹糗倍道一日行二百餘里  
質明掩至石坑賊出三千人陳山下官軍見賊衆

驚却吉拔劍先登軍皆殊死戰自辰至午賊敗走  
追之擒曾玉及其徒二十餘人斬首三百乘勝破  
龍歸及寶龍諸峒遂斬輝瑩會高雷廉三府苦賊  
請吉往時三府獨海康知縣王騏數破賊吉至卽  
督騏領民壯與賊戰賊敗斬首數百級奪回被掠  
子女千計旣而賊分三道攻吳川吉命騏出賊不  
意破其一餘皆遁去進副使降勅獎諭委以全廣  
軍務使便宜調度而騏亦得遷雷州府通判成化  
元年賊寇翁源吉帥官軍二千餘人兼程進斬獲  
百餘級賊西奔旣而新會告急吉率都指揮焦用  
潛菴先生史稿

列傳二十一  
卷十四

六

指揮閻華孫璧合官軍民壯至大磴與賊戰賊敗  
走乘勝追至雲岫山去賊營十里而舍分兵三道  
期雞鳴蓐食進擊會夜晦失期賊覺走伏山後軍  
士突入空營爭取其輜重賊擁衆馳下官軍大亂  
賊迫之閻華馬躓見殺衆皆潰吉仗劍大呼遮之  
不能止從吏廖振白吉避去吉叱之且殿且戰賊  
合力趨吉吉猶斬數人刃折遂遇害先是嶺表將  
士無敢殺賊者惟吉與王騏協力騏大理人有力  
戰先吉死事聞贈吉通議大夫廣東按察使謚忠  
襄騏贈雷州府同知子科舉進士歷官雲南按察

使

童軒字士昂上元人父碧瑄以精天官學永樂初命入文淵閣纂修步算諸書軒幼穎敏博學彊記舉景泰二年進士授南京吏科給事中有志經世之業杜門深居不妄交遊上言六事曰省冗員公考察倡武勇擇師儒杜倖達恤京民多見採納時詔南京守備採辦翠毛魚魷諸物以萬計軒極言其不可英宗復位劾戶部尚書張鳳反坐下獄會帝於宮中見軒前後奏疏嘉其敢言特詔復官尋改戶科成化初軒言帝王之治當知本末隆聖德潛菴先生史稿

列傳二十一  
卷十四

九

用賢才納忠諫愛小民謹邊備本也而簿書刑名特其末耳願時引儒臣講求祖宗謨訓及古帝王修身用人之道推而行之則聖德隆矣賢才隱于下僚或居散地有終身不得見一能展一策者宜命在廷三品大臣歲舉堪任方面一人且嚴連坐之法卽進用大臣亦召三品以上於便殿各舉一人以對科道糾察其非則賢才進矣臺省建言意本忠愛賞其直而貸其過則忠諫出矣養民之政在戶部凡奏報災傷宜卽加優恤則民生遂矣多方求將歷試所長官民小罪令輸粟于邊則邊備

修矣帝優詔答之四川盜王應高趙鐸叛勅軒往撫至則遍歷賊巢宣布威德諭以禍福應高等先後迎降軒召與飲食盡慰遣之進都給事中旣而復畔去軒上言蜀寇挾詐難信宜決策用兵遂借鎮巡三司分兵入險斬獲頗衆軒以爲鐸無足慮遽請班師且進露布自叙功伐旣而四川守臣報鐸勢復張于是廷議譁然歸咎于軒詔下法司論死而軒堅持鐸無足慮會捷奏至得寬其獄坐貶壽昌知縣未幾入覲上疏自理廷議以爲寃改雲南按察司僉事提調雲貴學政軒又習知歷法時

潛菴先生史稿

列傳二十一  
卷十四

二十

欽天監官治歷多舛廷臣交章薦軒召拜太常寺少卿掌欽天監事再進太常寺卿仍掌監事教諭俞正已請改歷法命軒與之考論不合上言歲差置閏其來已久雖日月薄蝕不無先後晷刻之殊分秒多寡之異則以土有南北高下不同故耳正已不知古法欲以小智亂成式宜下之理復言天下陰陽官納粟免考非制皆從之俄以病歸孝宗卽位復召掌監事元年夏六月朔日有食之軒言日食紀元之初當盛夏火旺之候宜修身窮理進

君子退小人以謹天戒辭監事且舉吳吳張紳高

鍾自代其冬進都察院右副都御史提督松潘軍  
務兼巡撫時四川歲祲開倉賑貸爲粥以食餓者  
流移之民給以餼糧俾復故業南路鎮番苦蠻酋  
出入歲減軍糧以備犒賞軍多逃亾軒奏以四川  
官帑銀布代之兵食以足又言松茂威登戍守甚  
艱而登溪一路尤甚宜調兵設衛令一都指揮守  
之要路各設一倉以便轉輸令一布政司官督之  
又言沿邊衛所州縣皆在萬山中關堡與蠻夷共  
有害而無利松茂一路尤稱崎嶇宜捐之則關倉  
廩可減兵無遠戍之勞民省轉輸之苦蠻有坐困

潛菴先生史稿

列傳二十一  
卷十四

三

之機凡八害三利以聞事下所司議行又薦按察  
使林俊才可任巡撫時論黜之遷南京吏部侍郎  
再進南京禮部尚書前後陳奏累數千言皆軍國  
重務累疏乞歸許之軒質清氣粹癯然若不勝衣  
而強學好問至老不倦爲文淵博雄麗足自名家  
天性孝友事嫡母過于所生分祿以養兄子終身  
如一日至其自奉蔬食飲水泊如也卒年七十有  
四贈太子少保

張海字文淵德州人也舉成化二年進士由戶科  
右給事中四遷至順天府丞進太僕寺卿丁艱服



除赴補過吏部尚書尹旻以人言去位一時政府  
盡斥其同鄉人海亦黜爲雲南鶴慶知府弘治元  
年召爲順天府尹遷兵部右侍郎六年命與都督  
同知侯謙偕往經畧哈密密者古伊吾廬地永  
樂二年以元裔安克帖木兒貢馬太宗封爲忠順  
王卽其地建哈密衛以居之使通西域天方等三  
十八國貢道忠順王死兄子脫脫嗣位賜金印誥  
命數傳至罕慎爲土魯番所殺朝廷復立其孫陝  
巴爲王土魯番又襲執之遣兵據其地故孝宗命  
海等經畧焉海謂禦戎之道先固疆圉如永昌鎮  
潛菴先生史稿

列傳二十一  
卷十四

三

彝等衛比近甘肅今永昌旣被殺掠而鎮彝人戶  
牛羊茁壯敵尤覬覦兩路孤懸難守宜擇謀勇二  
人率游兵二千互爲策應內旣無虞徐圖其外自  
治之道也奏免副帥一人罪鎮守以下三人以爲  
誤事之戒乃上安邊方畧六事其一爲先計以遏  
亂畧大約謂土番蟠據西域交構叛夷以規貢利  
昔莎車殺漢所置王馮奉世矯制誅之郅支單于  
拘留漢使陳湯矯詔殺之今阿黑麻殺罕慎有莎  
車之罪執陝巴有郅支之惡臣計此賊專仰貢路  
爲生可以計屈未可兵破若仍姑息恐墮其計中

以占哈密爲利階以養陝巴爲奇貨亂亦何時已耶不若追回給賜土番賞賚收貯甘州封閉嘉峪關暫絕西域貢道拘留其使以彰天威以挫寇志縱一二人歸語其酋自審去就責重諸將練兵聚糧爲經久之圖俟彼款塞求通果有誠意賓服上請區處則內振國威外定禍亂哈密可復也帝從之當是時大通事錦衣衛指揮僉事王英上言朝廷設立哈密當西域諸國貢路每歲諸方貢使至此必少憇以館穀之或遇番寇劫掠則兵馬亦可接護柔遠之道可謂至矣今土番奪城劫印并執

潛菴先生史稿

列傳二十一  
卷十四

三

陝巴跡其所爲悖逆殊甚聞罕東左衛居哈密之南野也乞里居哈密之東北怨土番次骨今宜降勅旌勞罕東赤斤等部使與火者賽亦輩盡力合攻以除土番之患是以寇攻寇之計也又迤西諸國皆藉入貢互市爲利今因土番爲逆下令諸國使臣不許進貢則諸國因失互利必與爲仇而阿黑妻子亦不得諸國賄賂不能無怨是土魯番之城空無人跡必弗能久占哈密矣而廷議皆欲命海以檄往如歸陝巴聽其入貢否則卽畱前使勿遣海至甘州奏立奄克輩爲都督指揮等官分居

苦峪城以圖興復又移勅令送歸陝巴竟不報乃  
修嘉峪關捕哈密奸人私通土魯番者悉戍廣西  
復上奏曰今土魯番貢使復來而陝巴尚未歸城  
池尚未復臣謹遵成算凡所貢方物盡驅出關示  
以絕意其前次貢使仍舊拘留封閉嘉峪關用遏  
西域貢路此後如天方國或撒馬兒罕使臣來貢  
仍詳驗放入其來自土魯番者一切拒之至於哈  
密餘人令暫居苦峪城修隍濬池使行有所齎來  
有所止耕牧者亦頗有其具臣當歸朝復命海還  
自甘肅言官並劾海等奉命經畧哈密二年事未  
潛菴先生史稿列傳二十一  
卷十四

五

就理輒上奏請還及至真定復得勅令賑恤甘涼  
邊軍海等又不請命徑自入朝宜論以法而帝亦

怒其無功因逮下法司獄尋貶山西參政至任未

逾年卒自是之後經畧哈密者皆不得其要領延

因事以究其終史法則然

至嘉隆之末哈密終爲土魯番所據幾裔款關內  
附督撫王夢弼命寄居甘肅之間時北敵日強朝  
廷頻歲僅備北邊無暇及關外事矣

論曰太宗初置哈密本以館穀西番隔絕羗寇乃  
脫脫旣無嫡嗣罕慎陝巴並以非類援立滌凶不  
堪負荷至拜牙郎直從叛如流水乃欲強之歸國

爲我外藩庸有異乎揚旌萬里侈言興繼祗令小  
醜得挾城印爲市靡敵中土蓋亦慎矣張海受事  
二年未見成功急於言歸卒挂吏議後馬文升襲  
擊牙蘭最爲得策惜闔外邊制敗我良謀彭王兩  
經畧並以邊才倚用然彭躁而疎王伎而愎適以  
疆事供陰陽報復之用功罪翻局若反覆寧可爲  
寒心乃議者至謂哈密不復比于鄧騭之棄涼州  
然則光武之閉玉門反不足法歟

論極得理

諸人事各不同賢否亦異或以戰功在邊方

潛菴先生史稿

列傳二十一  
卷十四

三

並有可論故相聯成篇耶

論極得理

然則光武之閉玉門反不足法歟

寒心以篇者至謂哈密不復比于鄧騭之棄涼州

其事也則謂其失之用也其謂其失其用也則謂其

失其用也則謂其失其用也其謂其失其用也則謂其

失其用也則謂其失其用也其謂其失其用也則謂其

失其用也則謂其失其用也其謂其失其用也則謂其

失其用也則謂其失其用也其謂其失其用也則謂其

韓青種興蔣信周玉周壘董寔和勇張欽神  
英列傳

韓青全椒人英勇過人善騎射承樂中太宗征迤  
北聞青名命爲前鋒攻殺甚衆師駐陽和命青率  
勁騎擊賊賊望風潰從宣宗討漢庶人又討甘延  
諸叛羗累進山東都指揮僉事操持清慎門無私  
謁暇則與賢士大夫論說今古以資見聞嘗駐節  
臨清總督江淮漕運將士不勞而事集土木之變  
出守紫荆關寬敞多岐路守者恇怯青倉卒招  
勁騎百餘諭以忠義令盡死報國衆皆感泣也先

潛菴先生史稿

列傳二十二  
卷十四

三

悉衆南侵七日至大同九日至廣昌破紫荆關青  
縱突騎逆戰于升兒灣身被數創中流矢自午達  
申轉戰益力賊圍之數重欲招降青青大罵不屈  
自刎死是日監軍副都御史孫祥亦死閱三日得  
青屍躬無完膚顏面如生贈鎮國將軍山東都指

揮同知以子嗣爵

宣宗信義無人又精甘

種興順天通州人初襲義勇左衛指揮僉事以薦  
進都指揮僉事正統元年北征以功進都指揮同  
知二年敗賊於駱駝山巡邊至本納荒泥禽賊把  
台等六人論功賚白金綵幣從遊擊將陳友襲阿

良哈首功最進都揔揮使尋守備廣武景泰初充  
左叅將鎮守甯夏西路天順元年賊犯洛陽川營  
於羚羊角屯興率師禦之於河賊不得渡乃陽循  
故道北歸而伏兵於堡左右興率銳卒千餘人追  
擊之至洛陽川伏發爲流矢所中裹創力戰以死  
事聞遣官諭祭于泰授鞏昌衛指揮使興老將習  
兵大小數百戰未嘗衄至是孤軍出河外掇援不  
至爲敵所誘邊人哀之

蔣信者忠勇王金忠甥也初名把台成祖時忠率  
部衆來降把台實贊成之旣而成祖知其謀特授  
潛菴先生史稿

列傳二十二  
卷十四

七

都督乃賜今姓名屢從戰塞北有功宣宗立念信  
遠來歸化無資產自給命給全俸及忠卒無子遂  
封信忠勇伯食祿歲千石土木之敗降也先也先  
以爲族類甚愛之令隸其弟賽罕王部下而信顧  
不樂也鬱鬱思南歸其年秋獲謀者三人二爲奄  
人喜甯家奴一廼信麾下指揮使安猛哥始知信  
已降敵而也先謀入寇故使三人來覘且潛結指  
揮石連台爲內應於是斬謀者籍喜甯家而釋信  
家不問恐驚諸降人也已而定襄伯郭登復獲謀  
者械至京且述喜甯代也先畫策將以五月陽稱

送太上皇歸因突據京師先遣間窺軍馬虛實大  
明皇帝果立否立者何如人又言信常謁太上皇  
語輒痛哭云帝歸則信歸帝畱則信畱其心常在  
中國彼誘也先肆掠者乃喜甯及小田兒也又言  
先是戰大同把八平章死戰京城下卯那孩平章  
及弟孛羅死人馬傷斃者十餘萬今大營柵九龍  
口精騎屯斷頭山所甚畏者中國大砲神銃短鎗  
爾會瓦剌使皮兒馬黑麻來貢馬且約和信舊部  
將伯顏答里從信因遣密告少保于謙曰信感國  
恩思歸久矣不獲間每南望揮涕慙死無地謙因  
潛菴先生史稿列傳二十二  
卷十四 三  
奏言信倍德降敵罪宜孥戮陛下不忍加誅矜全  
其家恩甚厚信或未知宜令伯顏答里北還密諭  
信妻子無恙令畫策沮敵毋南寇或伺間擒殺也  
先來歸拜王爵因敵用間事成足以弭亂不成亦  
足疑寇心景帝從謙言信從上皇至大同大同諸  
將吏不敢出喜甯喉也先殺袁彬信告上皇獲免  
上皇在迤北信擁護功居多後卒從上皇歸居無  
何卒贈忠勇侯謚僖順子也兒孛忽嗣封天順元  
年改名善

周玉字廷璧其先潞人父賢有勇畧善戰積功凡

七遷至後軍都督府僉事充右參將守獨石天順  
二年寇犯延綏召賢帥師往援與賊戰多斬獲三  
年哨賊野馬澗爲流矢所中死贈都督同知玉時  
甫弱冠痛父歿王事感憤誓滅賊援萬全都司都  
指揮同知督屯田巡撫葉盛薦掌都司事成化元  
年王越總諸道兵以爲遊擊將軍領奇兵是歲援  
延綏斬獲甚衆九年春寇逼漫天嶺率所部拒之  
斬首七十餘級獲駝馬器仗以萬計論功進都指  
揮使時賊雖挫衄然尚據河套爲巢穴議潛兵搗  
之諸將相顧莫敢任玉慷慨請行與許寧率輕騎  
潛菴先生史稿

列傳二十二  
卷十四

无

直趨紅鹽池擒斬三百五十餘人焚其巢俘斬無  
算進署都督僉事十年秋援宣府西路戰於馬營  
齊家溝再戰赤城所向皆捷明年遂充副總兵鎮  
宣府十三年佩鎮朔將軍印畱鎮謀賊數窺邊  
玉計大創之率兵出青邊口至紅崖復至龍門獅  
子衝屢破其衆追奔至水磨灣乃還功最進署都  
督同知十九年賊出柴溝堡玉逐之抵白腰山尋  
復援大同天城追擊之於定安營皆斬獲賊級奪  
其軍資牛馬而歸積二功得予實授仍署右都督  
是年掛征西將軍印徙鎮寧夏冬十月敗賊棗兒



清二十二年寇犯甘肅命掛平羌將軍印鎮守賜  
勅獎勵蓋至是凡三佩印矣明年實授右都督先  
是成化初土魯番入哈密據王母金印去至是復  
殺都督罕慎據其城朝議大發兵進討玉請因迤  
西使還命齎詔往諭可不煩兵革已果入貢帝大  
悅賜勅獎諭玉嚴毅凝峻自偏裨至大將撫士卒  
有恩稍不用命罰無赦每遇敵計定後戰故常取  
勝寇至見其旗幟輒驚遁邊關倚重者三十餘年  
然亦因是成疾前後七十疏乞解兵柄皆不允弘  
治八年卒謚武僖

潛菴先生史稿

列傳二十二  
卷十四

辛

周璽字廷玉其先遷安人後家東安璽少負氣自  
豪遇事剛決無所避精騎射知兵習戰所向輒有  
功成化二年襲父職指揮使七年征迤北功進署  
都指揮僉事充右參將分守陽和十六年威寧海  
功進都指揮同知調大同副總兵十七年黑山墩  
功進都指揮使十八年黑石崖功署都督僉事十  
九年亦思馬因大舉入寇璽兵三千人赴懷仁  
賊逼夏米莊中軍失利璽親兵援之夜遇賊乘勝  
張甚璽大呼厲將士曰今日有進無退退則無遺  
類矣衆感奮與戰賊少却良久復深入璽臂中流

矢呼左右拔鏃督戰益銳與子鵬擊殺數十人會  
遊擊將軍劉甯至合兵中軍潰卒亦稍集其擊賊  
賊退諸失律者皆坐罪璽獨以功實授都督僉事  
三十年總兵鎮代州兼督鴈門三關弘治初移鎮  
陝西復充總兵官佩征西將軍印鎮甯夏璽嘗念  
大功未立旣開府益自樹立修邊牆繕墩堡訓軍  
積粟爲經久計忽得疾且革召諸子曰吾承祖父  
業歷邊鎮二十餘年大小數十戰幸有功今得佩  
印專閫更復何望獨未嘗大創賊報天子爲憾今  
死矣氣垂絕忽大呼曰好殺好殺遂瞑

潛菴先生史稿

列傳二十二  
卷十四

三

董寔字世宏先世懷甯人祖真保燕山左衛百戶  
從成祖起兵歷指揮僉事戰死夾河父智代仕至  
大同中屯衛指揮使徙治河間寔駢脅鐵面膂力  
絕人性沉毅寡言笑稍長涉經史習金版六韜善  
騎射一時軍職子弟無及者兄宣嗣父職卒無嗣  
寔繼任正統十四年也先入寇給事中程信薦其  
謀勇召赴京城下之捷廷議遣追躡寔言國兵新  
衄賊勢尚張不若固守賊內不得戰外無所掠必  
引去尚書于謙深然之先是永樂中處降人河間

東昌諸郡爲肘腋患會西南用兵謙奏選其驍勇

從都督毛福壽征蠻而餘衆乘間剽劫謙謂竄可  
任薦署都指揮僉事將兵自京抵河間狗捕之兼  
督河間瀋陽大同三衛兵盜平遂命鎮守河間地  
瀕水土城壞賊至拒水守之竄甓外城增重門訓  
民戢士人賴以安景泰四年召還督操神機營六  
年從南和伯方瑛征湖廣五開銅鼓苗四十餘戰  
皆捷至擢羅擡綱二寨山益險惡衆驚顧莫敢前  
竄奮勇先登諸軍乘之遂克以功實授都指揮僉  
事天順元年署左軍都督府僉事嘗與諸公侯校  
射南苑矢發皆中帝大喜他日指謂諸將曰此黑  
潛菴先生史稿

列傳二十二  
卷十四

三

面都督最善射特賜鈔幣二千曹欽反竄率麾下  
士邀戰西長安門外賊潰奔還家遂與諸軍擒欽  
論功實授都督僉事是歲總揚州諸道備倭軍開  
府於吳厲將士嚴斥堠簡修戰艦戎器暇則延禮  
師儒凡武學與鄉選輒厚贖之隸庠序者爲蠲其  
徭役時以爲賢尋兼領蘇常通泰諸州郡時鹽徒  
錢厚聚衆倡亂僭號江海上公東南騷動竄畫圖  
分諸道刻期進兵策賊敗必走江北嘹角嘴約巡  
鹽御史伏兵數百爲應且曰如約當捕賊無餘不  
然且逸其半已而失約竄獨以兵進獲厚及其黨

數十人餘奔噉角嘴其料敵如此成化九年以疾歸子清襲爲永清左衛指揮使竇少孤事母至孝母病日跪奉湯藥三月不懈諸子皆訓以禮義無席寵怙侈者家居崇經講武有古儒將風

和勇迤北人祖阿魯台初爲瓦剌馬哈木所敗率其部落稱臣內附永樂初封和甯王仍居漠北後復叛宣德九年爲瓦剌脫歡所殺其子阿卜只俺勇之父也窮蹙來歸命隨軍積功爲中軍都督賜第京師尋卒勇以父故爲錦衣指揮使正統十四年英宗北陷也先擁衆入紫荆關總兵官楊洪等潛菴先生史稿列傳二十二卷十四

三

帥師敗之勇從諸將追擊大有斬獲歷遷都督僉事天順元年進都督同知五年都御史葉盛都督顏彪討兩廣蠻賊以勇爲遊擊將軍成化元年大藤峽賊復反仍以遊擊將軍從都御史韓雍征蠻將軍都督趙輔統兵往討師至潯州諸將並進勇斬級功多進左都督封靖安伯食祿千一百石勇爲將猛而有方畧性廉謹兩廣之役諸將滿橐中裝勇於財物無所私世以此多之卒贈侯謚武敏子忠亦歷戰功爲錦衣指揮僉事乞嗣伯不許得指揮使

張欽字克敬京衛人世將家永樂二十一年代父  
任南京留守右衛指揮僉事正統六年從征麓川  
抵鎮康州破降其酋進攻上江諸寨下之王驥奇  
其功承制進都指揮僉事時諸軍自沙木籠山進  
圍麓川欽率偏師潛入其中堅大軍乘之思任發  
走緬甸餘衆悉降師還得世襲指揮使八年掌中  
都留守司事以所部兵從甯陽侯陳懋討閩寇鄧  
茂七進都指揮同知景泰元年再從入閩殲餘寇  
延平進都指揮使尚書于謙上欽前後功奏署後  
軍都督府僉事調中軍天順元年副彰武伯楊信

潛菴先生史稿

列傳二十二  
卷十四

十四

守延綏慶陽明年孛來寇神木帥師禦之於柴溝  
捷聞進都督同知充左叅將專守延綏西路孛來  
旣不得志復大入安邊營欽分道拒之連戰於花  
馬池野馬澗俘其將鬼力赤獲駝馬兵仗及還所  
掠人畜視柴溝倍之特勅褒諭楊信奉詔移大同  
欽代領其衆尋佩征鹵副將軍印總延綏各道兵  
成化元年召還復理中軍時方大閱簡精兵十二  
萬欽分統揚威營蓋出入兵間者三十五年卒贈

左都督

神英字景賢壽州人祖忠父傑永樂中從北征累

立戰功官至陝西都司都指揮同知天順元年傑  
卒英襲職爲榆林甯塞營守備屢將騎兵從都督  
張欽參將房能彰武伯楊信戰甯夏皆功最成化  
元年兵部尚書王竑行邊奏英功進都指揮僉事  
四年從征石城復有功進都指揮使充延綏右參  
將時亂加思蘭潛伏河套數入寇英率師禦之敗  
之於開荒川復敗之於蘆溝以功進署都督僉事  
余子俊建議築邊牆英經營規度子俊數稱其能  
十三年掛征西將軍印充總兵官鎮守甯夏已改  
靖西將軍鎮延綏復改鎮朔將軍鎮宣府弘治元  
潛菴先生史稿

列傳二十二  
卷十四

三

年以大同爲京師屏蔽英宿將有功綏急可倚賴  
乃復佩征西前將軍印總兵鎮守申軍令嚴斥堠  
寇憚之每有侵犯輒挫衄去十三年召還京統理  
果勇營務明年充右叅將督京營兵征延綏再充  
左叅將治兵宣府所向克捷論功爲諸將冠正德  
元年進都督同知僉書左軍都督府事勦畿輔劇  
賊進右都督五年給事中毆豸劾英年老不任軍  
旅致仕是時劉瑾用事英素習瑾有旨英歷官五  
十餘年戰功多下兵部議封爵尚書曹元盡錄上  
英前後首功中律復下廷臣議莫敢異遂封涇陽

伯食祿八百石予世券數月瑾敗言官交章論英  
以金寶萬計賂瑾得封奪爵繳誥券仍以右都督  
致仕然英實驍勇敢戰先登累有斬獲功

論如衡平方可是非古人

潛菴先生史稿

列傳二十一  
卷十四

姜

乃復... 竟憚之... 某... 左... 本年... 遂... 以金寶萬... 前...

蔣貴任禮趙安譚廣山雲毛忠趙輔李震王

信列傳

金瓶梅

卷一百一十五

蔣貴字大富江都人由燕山護衛卒從成祖起兵積功至昌國衛指揮同知已從平交趾四出沙漠敗敵于九龍口洪熙元年復敗之大松嶺斬獲功多進都指揮僉事移掌彭城衛宣德二年松潘蠻叛充右叅將帥兵往討首募鄉導絕險而進賊大驚一日十數戰遂敗之明年進都指揮同知鎮守密雲諸關尋進都督僉事充副總兵貴大閱士卒進兵連破四十餘砦斬首千五百級俘獲稱是以

潛菴先生史稿

列傳二十三  
卷十四

七

功進總兵官佩平蠻將軍印鎮守其地正統初召還爲右都督是時阿台朶兒只伯數擾塞下殺掠吏民邊將屢失利乃命貴仍以右副總兵與左都督任禮分道禦之禮與貴勢敵不相下狐疑莫發都御史羅亨信與都督趙安率兵至魚兒海約貴軍共擊之爲安敬所誤乃遣王驥責狀語具驥傳貴感奮後戰于石城斬獲功最寇竄兀魯乃地貴自鎮彝問道兼行三日夜追至敗之俘其左丞脫羅及裨校數百人獲金銀璽印各一駝馬兵甲以千計阿台朶兒只伯以數騎遁去還封定西伯祿



三千石佩平羌將軍印鎮其地是役也任禮趙安  
皆有功封伯而上以貴功尤大予世券是時雲南  
麓川思任發叛官軍討之不利于是命尚書王驥  
總督軍務而貴爲平蠻將軍合漢土兵十五萬人  
往討瀕行賜賚甚厚驥貴以二萬人趨上江居五  
日閱師江上抵麓川思任發攜一子間道走孟養  
獲虎符金牌信符宣慰司印進封貴爲侯貴果勇  
善戰雖至大將猶摧鋒陷堅驥前後皆賴之而貴  
非驥亦無由奮發成大功思任發旣竄其子思機  
發糾餘衆居麓川者往來窺伺復命驥總督雲南  
潛菴先生史稿

列傳二十三  
卷十四

三

率都督同知冉保等討之比至思機發已前走緬  
甸索之不獲而思機發衆漸盛不能制驥請濟師  
改命貴佩印冉保毛福壽爲左右叅將調土兵五  
萬往討發卒轉餉三十萬人貴等至雲南檄緬甸  
令送思任發緬甸陽聽命而遷延不至驥謂貴曰  
此給我也過江則扼我歸路且瘴癘將發不戰何  
待乃進次騰衝分軍爲五與貴及都督沐昂各將  
一軍馳之及江緬甸擁衆大至驥乃誘其使宣言  
聽犒而貴潛以兵沿江下焚其舟數百艘緬甸潰  
遂趨者藍搗思機發巢破之思機發脫身走得其

妻子部落九十餘人象十一而還益貰祿五百石  
正統二年總兵禦邊又明年卒年七十贈涇國公  
謚武勇長子義跋以義子琬嗣侯領直宿將軍侍  
衛成化初佩平羌將軍印鎮甘肅琬少敏慧畧涉  
經史一時諸子侯多推讓之顧尚氣挾詐在鎮惡  
巡按御史鄭巳矜傲誣以罪按之無驗而琬方有  
寵竟坐巳戍八年召還協守南京兼督操江十年  
以災異上章乞解機務且言血氣方壯願領邊寄  
自劾帝褒答之尋召總神機營兵十年琬上言太  
祖肇建南京京城外復築土城以衛居民誠萬世  
潛菴先生史稿列傳二十三  
卷十四

堯

之業今北京止有內城正統巳巳之變衆庶奔竄  
內無所容前事可鑒也又言養兵之制莫善屯田  
今竭東南民力轉漕以實京庾又勞八郡民飛輓  
以供邊餉兵民俱做費出無經則以屯田之利未  
徧舉也且大同宣府諸塞下膏腴土田無慮數十  
萬悉爲豪右所占租稅不供稍遇兵荒全仰內郡  
卽畿內八郡良田勢要之家又妄以荒蕪陳乞日  
益股削失業之民控訴無所脫使邊關警內郡何  
由濟運道阻京師何由給居安思危不可不慮疏  
入下所司雖不能盡行時論韙之十三年帥京軍

二萬往大同防秋陳軍中機宜十餘事皆報可明年召還加太子太保十五年偕太監汪直尚書林聰按事遼東并圖上方畧二十年鹵大舉入寇詔琰佩將軍印總京兵往禦兼節制宣大諸軍叵何鹵引去班師又明年加太保兼太子太傅明年卒贈涼國公謚敏毅子驥嗣侯典京營兵弘治八年充總兵守薊州永平山海十三年佩前將軍印鎮遼東徵還侍衛董神機五千營十八年守湖廣正德初劉瑾方橫嘗索賂于驥驥弗予叵何卒驥歷官中外二十餘年卒之日家無餘貲子經嗣卒子潛菴先生史稿

列傳二十三卷十四

早

傳嗣嘉靖三十一年鎮兩廣以平獠功加太子太保卒無子弟佑嗣卒子建元嗣卒子承勳嗣卒子惟恭嗣卒子秉忠嗣京師陷乃絕

任禮字尚義臨漳人洪武末隸籍大興衛從成祖起兵累功爲指揮同知四從出塞進都督僉事從宣宗征漢庶人擢右都督尋轉左正統元年佩平羌將軍印充左副總兵鎮甘肅與蔣貴等並出塞無功三年以總兵從王驥西征擊敗阿台朶兒只伯於石城復帥兵追至梧桐林執其樞密同知院判等官十五人又至亦集乃地執其萬戶二人朶

兒只伯遠竄禮將二千騎追襲五百餘里至黑泉而還以功封甯遠伯食祿千二百石八年四月赤斤蒙古衛都督僉事且旺失加請移居內地以避瓦剌禮持不可已而請建寺其地禮又持不可十一年沙州衛都督僉事喃哥等欲內附未決禮以大軍薄之盡收其部落入塞復發兵抵罕東擒叛酋鎖喃奔十四年也先分道入寇抵肅州禮遣都督王喜禦之喜違禮節制戰臨水堡敗復益兵令都指揮劉震截之兩山口又敗奉御阮和都指揮谷聰胡麟指揮閻震皆戰死失亾士馬以萬計徵

潛菴先生史稿

列傳二十三卷十四

望

還兵部劾之詔杖喜百謫戍甘肅震責狀宥禮等以伯就第景泰元年復起督三千營已命率兵巡易涿真保諸州郡以老辭勒致仕久之起守備南京天順初入掌中府亾何以老奉朝請禮起卒伍至大將雖不知書而持律守正未嘗有過在邊歲久熟知外國情形正統時嘗奏也先久蓄異志狡焉思逞不可不爲之備時王振用事以爲過慮未幾果有土木之變人稱其先見成化初卒贈侯謚僖武子壽從征朶兒只伯王驥言其驍勇冠軍朝廷賞勞有加後征滿四失律徵還下獄論死減戍

廣西卒子弘乞嗣與世京衛指揮使

趙安狄道人洪武間坐從兄琦罪謫戍甘州永樂  
初貢馬除臨洮衛百戶使西域從北征以功進指  
揮同知宣德中充左叅將從都督陳懷征松潘番  
寇有功遷都督僉事奉詔使畢力木江還復以左  
叅將從都督史昭討曲先斬俘爲多又同侍郎徐  
晞征阿台朶兒只伯等進都督同知尋充副總兵  
守甘肅正統三年從王驥西征擒乃顏刺忽及奄  
克台等封會川流伯食祿千石四年鎮涼州安勇  
毅有將畧屢立戰功與任禮各相埒卒於官諭祭

潛菴先生史稿

列傳二十三  
卷十四

望

賻卹如例子瑛都督同知卒子鉉乞嗣伯不計

譚廣丹徒人開國初爲燕山百戶從成祖起兵首

縛中朝人陳榮等三十二人敗尚書齊泰兵又戰

白溝真定夾河以功遷指揮使又敗都督韓觀兵

遷大甯都指揮使再從出塞至九龍口以神機營

兵先鋒破敵進都督鎮宣府洪熙元年佩鎮朔將

軍印宣德八年廣以事杖殺萬全都司經歷蕭翔

言官交章奏劾帝曰漢大將軍衛青提兵於外將

士有罪未嘗輕戮皆請天子自裁時以爲知禮蓋

善作威福良臣弗爲廣武人不學未達此義念久

在邊圉其宥之都察院仍封示彈章俾之知微正  
統元年以捕獲中律封永甯流伯食祿千石九年  
卒于鎮廣素以驍果知名文皇帝出塞每用爲前  
鋒鎮宣府二十年威行塞外十年子亨爲指揮使  
屢乞嗣伯吏部言非世券不許成化三年巡撫宣  
府僉都御史葉盛言故永甯伯譚廣逮事太宗功  
在漠北所統部曲號譚家軍鎮宣府兒童婦女皆  
知其賢而爵位僅及身而止與功不稱事下吏部  
格不行時論惜之

山雲徐州人父青永樂時官都督僉事雲姿貌魁

潛菴先生史稿

列傳二十三  
卷十四

望

梧善騎射性廉勇有智畧以廕爲金吾左衛指揮

同都御史王彰修邊自居庸達山海程率有功又

從成祖出塞力戰擒斬多進都督僉事初青從高

皇帝起百戶積勞二十餘年後從燕王南下有功

始得僉軍府而雲年少彎弓馳邊塞不數年遂如

父官於是一時徹侯宿將無不羨其材洪熙元年

命充遊擊將軍備薊州永平山海宣德二年代顧

興祖鎮廣西時谿洞獠獯叛服不常歲殺掠吏民

以萬計雲至肅號令公賞罰臨敵身先士卒設奇

用間賊不能測三年討忻城蠻寇譚團等於永淳

縣破之四年進勦柳潯二州寇廖得甯藍其陸等  
斬之五年討平樂蠻再討慶遠諸蠻九年督部將  
彭英李義等勦捕思恩蠻寇覃公碧梁公成潘通  
天等追捕餘黨悉平之凡雲前後征勦共斬首九  
千三百七十七級歸陷賊男婦二千二百四十四  
人擒殺興安諸邑寇渠魁二百九十四人收七源  
等州歸附家屬三百七十有七人築堡九城四傳  
舍五百餘區分別要害偵探迅密又遣兩江狼兵  
屯種近山荒田斷賊出沒自是獠獠屈服終雲之  
世悉受約束威行嶺表先是諸蠻歲掠吏民以萬

潛菴先生史稿

列傳二十三  
卷十四

器

計官軍討捕則退保巖砦山固多藤蔓引糾結上  
壘木石官軍至則斷藤下之人皆辟易雲一日聚  
牛羊繫葦其角夜半發火驅向賊賊望見以爲大  
軍至亟斷藤木石盡下比明不見官軍遂弛備雲  
乃引軍馳造其下賊木石已盡遂登山蹙之凡雲  
臨敵應變類如此方雲之始至也有鄭牢者帥府  
此即牢一小傳  
老隸也逮事前帥韓觀觀威嚴每醉後命牢傳令  
殺人牢疑不當輒留之俟觀醒入白其寃觀悔爲  
賞其人益德牢以其能釋已過也至是有言牢於

雲者雲進牢試問曰自古爲將者不忌貪此地饒

珍貨我亦可貪乎牢曰白袍點墨不可湔也雲曰  
人言土司餽獻苟不納彼疑且忿奈何牢曰居官  
黷貨國憲甚嚴矧前帥之敗渺不由賄公不畏朝  
廷乃畏蠻子耶雲竦然舉手謝之雲旣絕餽獻頗  
更以嚴法馭諸司曰此輩獷悍不知朝廷法久矣  
若遽示姑息亂之道也至撫輯軍民則率尚慈惠  
人以此益畏愛之正統元年貴州按察使應履平  
劾雲擅作威福雲自陳上不問三年卒初韓觀守  
廣西專殺慶遠諸生來迓觀曰此皆賊覘我也推  
出斬之雲鎮廣西幾十年恩威並用不輕殺人故  
潛菴先生史稿

列傳二十三  
卷十四

罷

卒之日粵人巷哭罷市立祠祀之上聞贈懷遠伯  
謚襄毅子俊襲府軍前衛指揮

毛忠字允誠先世蜀人後徙武威曾祖哈刺歹洪  
武初率衆歸附遂隸籍涼州父寶以勇力選充總  
甲永樂中從捕沙州叛寇進伍長復從出塞授永  
昌衛百戶卒忠膂力絕人善騎射年二十代寶領  
兵從征寧夏至賀蘭山後擒斬有功復從北征至  
牛壁山宣德中從征曲先叛寇進永昌副千戶再  
從征哈喇脫歡進指揮僉事從破阿台兵於涼州  
又從破敵於黑山進指揮同知正統元年從總兵



蔣貴征朶兒只伯以七騎破其前鋒功最進都指揮僉事尋進同知哈密使臣朝貢歸過罕東地被掠命忠出罕東追撫忠至大集渠魁諭以恩信皆羅拜盡歸其俘掠而還沙州都督喃哥潛通瓦剌謀入寇忠設計擒斬之進都指揮使征罕東功最進右軍都督府僉事援叅將劉震於牛截墩斬獲甚衆充右叅將鎮甘肅先是忠擒番僧加失領真至京師赦不誅逃至也先營用事禮部侍郎李實往迎英宗僧欲中忠以奇禍設問答語告實實歸奏之朝廷知其誣不問調守福建英宗復位卽日

濟菴先生史稿

列傳二十三  
卷十四

吳

召爲都督同知命同西寧侯宋誠出鎮甘涼召見文華殿賜玉帶明日再賜白金織蟒尋又召至文華殿面諭降勅獎勵賜銀鈔兵出涼州三戰三捷論功進右軍左都督孛來擁衆寇莊浪與總兵衛穎分兵追擊之賊少却卽領騎士三千於涼州十里舖立營衆方集賊數萬騎突至忠率將士悉力拒敵賊應弦墜馬者無算衆稍却賊帥復立陣前大言以惑我軍圍益急忠單騎出責以不臣之罪自背盡裂會援軍大至賊遂解去復大捷於永昌同衛穎征番忠先登手斬番賊轉戰俘獲功多

封伏羗伯食祿千石總兵鎮甘肅固原州滿四反聚眾萬餘據石城官軍追勦皆莫能破憲宗命右副都御史項忠督師討之令忠率甘涼軍馬往會軍既至都御史命忠等由木溝頭進忠令曰聞砲聲而縱見烟舉而回次日薄石城門遇賊迎敵以二百騎衝砲架山截山奪險連破七峯山上老稚號泣奔走功垂成忽昏霧起他哨誤先舉烟掣軍賊乘風盡抽餘黨以死決戰忠孤軍相持自己至酉大小十餘戰射矢皆盡拾賊矢射亦盡忠爲流矢所中回至半山而卒孫鎧前後躍馬射賊甚

潛菴先生史稿

列傳二十三  
卷十四

四

眾賊執鎧斷指裂額曰爾能復射否是日從子海及鎧同沒於軍事聞追贈奉天翊運宣力武臣特進榮祿大夫柱國伏羗侯謚武勇世襲伯爵忠初名哈刺後始賜姓及名生長西陲知邊情由校尉至大將屢經戰陣奮勇卻敵敵所畏惟忠忠死益肆猖獗云初忠之死也夜半風起折旗纛拔廬帳營中士卒皆聞甲馬聲幕下卒王寬夢忠告曰我必馬上生擒滿四旣覺驚愕御史鄧本端聞之卽起祝曰噫毛公死矣幸助我滅賊當具奏立廟祀公未幾滿四就擒伏誅忠子佺先卒孫銳嗣有祖

風引治十三年鎮兩廣再加太子太傅正德三年  
劉瑾索銳賄不能應落太子太傅奪祿十五勒罷  
瑾誅銳自陳得還祿復官嘉靖三年卒贈太傅謚  
威襄子江嗣卒無子弟漢嗣卒無子姪桓嗣卒子  
登嗣卒子國輔嗣卒子承祚嗣明亾爵除

叙戰功官爵謹嚴似樊鄴諸傳

趙輔鳳陽人梁國武桓公德勝從孫也父本字宗  
立未生而孤既長襲任邳州衛指揮使督造海舟  
創新開以才能稱於戎事尤練習從太宗入金陵  
四征沙漠又從宣宗討漢庶人功最進山東都指  
潛菴先生史稿列傳二十三  
卷十四

吳

揮僉事山東饑朝議停支屯卒月糧本爭曰支尚  
苦不給不支則轉溝壑矣發廩給如故吏不可本  
曰有罪我當之因以上聞卒如所請未幾卒輔嗣  
爲濟甯左衛指揮使正統十四年也先內犯吏部  
尚書王直等薦輔才召署都指揮僉事管京營景  
泰元年充左參將出守懷來天順初進都督同知  
掌右軍事與董造南內宮殿又督運木植於徐州  
工成賜白金綵幣成化元年以上戰車制是年兩廣  
蠻作亂兵部尚書王竑薦韓雍總軍務乃以輔爲  
征爨將軍發兩京江西湖廣兵討之輔親督戰至

大藤峽擒斬賊級二萬一千有奇俘獲賊屬一萬

二千奪回被俘男婦六千四百馬牛羊輜重不可

勝數破賊寨八百三十燬賊房二萬五百師還封

武靖伯食祿千二百石是年餘賊復相聚為盜巡

按御史端宏奏輔等破峽有功然妄言賊息民安

罪亦當問輔上疏自陳并請率兵圖效詔止之三

年五月充總兵官同都御史李秉率兵討董山大

捷進流侯輔自起偏裨至大將兩平劇寇皆以材

畧為時所稱大蔭之役機宜悉出韓雍而輔推誠

善下及討董山復與李秉同心協力故所向輒有

潛菴先生史稿列傳二十三

卷十四

晃

功八年亂加思蘭出沒河套廷議大發兵勦之尚

書白圭請遣威望武臣為總兵乃復命輔偕右都

御史王越刻期大舉輔越議還兵守邊圖進取為

言官所劾十一月以疾還十年輔辭流侯乞世伯

帝許之二十二年卒追封容國公謚恭肅子承慶

嗣卒子弘澤嗣卒子世爵嗣卒子國斌嗣卒子光

遠嗣卒子祖芳嗣明叅爵除

李震南陽人父謙都督僉事震嗣指揮使正統中

征兀良哈木麓川並以功最歷遷都督僉事天順

四年充總兵官征武岡黎平賊五年進攻兩廣貴

州蠻進都督同知成化元年還兵征荆襄賊進左  
都督十一年震奏沅靖等衛控制川貴廣西諸蠻  
頃見蔡溪清水江苗賊攻掠獲利輒相効尤請如

靖遠伯王驥故事會兵搜勦期于殄滅憲宗曰蠻

邦不靖自古患之要在邊將羈縻得宜使不敢越

境爲亂而已曷必以殄滅爲快哉震等其與川貴

廣西將吏各督兵民分屯要害仍相度機宜酌量

勦撫若賊勢果熾必須統軍進討宜俟轉輸旣足

奏取進止十二年與右副都御史劉斌督軍分五

道而進破寨六百有奇斬獲萬計勅獎諭之封興

潛菴先生史稿列傳二十三卷十四

甯流伯食祿千石震在荆襄與參將吳經有隙經

弟綬掌鎮撫司從汪直刺事適有道人以黃白術

得罪卽附奏震嘗匿道人私習讖緯將謀不軌遣

使逮至京震途遇直呼曰一介武夫蒙恩擔爵富

貴已極更欲何爲此仇家吳經所爲願公聽察直

佯若不聞下震錦衣獄鞫訊無驗久之帝亦察其

枉宥之直敗震乃得復爵乞誥券不許卒後子昂

不得嗣

王信字君實南鄭人父忠征迤北戰死母岳氏生

信甫半歲苦志守節奏聞並旌忠節正統中信襲

寬河衛千戶十四年也先犯京師拒戰西直門進  
指揮僉事景泰六年從征五開諸蠻遷指揮同知  
天順五年署都督僉事守代州提督鴈門關成化  
初守荆襄二年石龍劉通反信度房陵地勢險阻  
率數十騎據之時民兵不滿千人賊衆四千餘突  
至力攻主帥逗遛不援信拒戰四十餘日乃選死  
士從間道出城五六里舉火礮賊疑援兵且至驚  
走迫斬六十級轉都指揮同知鎮臨清兼理倉儲  
凡官民利弊及河道閘壩區畫悉中條理移鎮湖  
廣有詔詢軍民機務條上八事曰繕城隍廣儲蓄  
潛菴先生史稿

列傳二十三  
卷十四

至

省徭役立賞罰選廉能禁窩盜練將才慎守備又  
以地方水災禾稼漂沒鄖陽新築城垣傾頽過半  
奏陳備患之策帝皆嘉納永順保靖二土官世相  
仇殺信諭以禍福卽解靖州及武岡蠻久不戢守  
臣議勦滅之信不可乃親詣邊境召諸蠻犒以牛  
酒責其跳梁無狀衆稽顙曰累歲苦揮使徵索故  
亂耳今將軍卹我厚敢復反耶亂遂平十七年疏  
言湖廣諸蠻雖腹中之蠹實無能爲但我軍利其  
竊發可以邀功今宜選精銳慎隄防其患自息荆  
襄流逋本避徭役耳濫加誅殺恐及無辜城池器

械以備不虞當亟修繕南畝之農無所蓄積歛獲未竟餼糧已空機杼方停布縷何在求免饑寒不可得也乞選守令加意存恤濫陞官爵無慮千百皆無一矢之勞曷崇階之賞乞查勘削奪三司方面所以折衝禦侮承宣激揚者也當公以格物廉以律已端本澄源在朝廷而已所部指揮劉斌張全有智勇疏薦於朝其畧曰英雄之士處心剛正安肯抑心低首奔走媚求若不曲加延訪則賢才多隱志士沉匿朝廷雖欲得人任用何能廣乎遷都督同知總理漕運慷慨語人曰荷國厚恩未能潛菴先生史稿列傳二十三  
卷十四 至

報稱此行當以江水滌肺腸少盡區區耳帥府舊有湖前帥擅漁利其中信開通以泊運舟凡公私勢要奪水病運道者一裁以法信沉毅簡重喜儒素出入省驕從嘗曰儉足以久死之後不以侈累子孫我所遺也歷鎮三十年不營私產不爲子弟乞官遇故人婚喪則傾資助之子繼善從善皆舉進士有名

此武臣之功德並懋者叙戰功各有簡法

